

ROMA PUIBLUPI CRISTOWA TUKUSKAKUNATA SAN PABLO KARTA KACHASKAMANDA

¹ Nuka, Jesucristopa lutrinsinami kani. Taita Dius agllaska kachamuskami kani, paimanda Alli Willaita willaspa puringapa. ² Santu Ispirituwa rimagkunawami ñugpamanda librupi niska karka, chi Alli Willaita willagsamungapa. ³⁻⁴ Chi Alli Willaiwami ninchi, nukanchipa Iaia Jesucristo, sutipa Taita Diuspa wambra kagta. Pai Jesucristo runa tukuskapa, atun mandag Davidmi paipa ñugpamanda achala taita kapurka. Pai wañuskataka, Taita Dius kikinmi, Santu Ispirituwa iapa iachaiwa kaugsachispa, kawachirka paipa wambra kagta. ⁵ Taita Diusmi, Jesucristowa nukanchita iapa kuiaspa, agllaspa kacharka, Alli Willaita willaspa puringapa; chasaka tukui puiblu niraiaskakunamanda kaugsagkuna, paimanda uiaspa, paiwa suma iuiarispapa, pai ima niskata ruraspapa kaugsangapa. ⁶ Kamkunapas chasallata agllaskakunami kangichi, Jesucristopa kangapa.

⁷ Romapi kaugsanakuskatami kai karta kachaikichita. Tukui kamkunata, Taita Dius iapa kuiaspa agllarkami, paimandalla kaugsangapa. Nukanchipa Taita Dius i Iaia Jesucristo, kamkunata kuiaspa, suma iuiaiwa kawapuachu.

San Pablo, Romama chaiagringapa munakuskamanda

8 Kamkuna Jesucristowa suma iuiarigkuna kaskamanda, tukui alpapimi iacharí. Chimandami, tukuimanda ñugpa, tukui kamkunamanda nukapa Taita Diusta: “Pai Siñur” nini, Jesucristota iuiarispá. 9 Taita Dios ima niskata nuka tukui iuiaiwa ruraspa, paipa wambramanda Alli Willaita willagmi kani; paimi iachá, nuka kamkunamanda paita mana kungarispalla mañakugta. 10 Paitami tukuipi mañakuni, pai munagpika, nuka imasapas kamkunapagma chaiagringapa. 11 Iapami munanakuikichita kawagringapa; chiwanka, Santu Ispirituwa imapas kamkunata karaspa, tukuipi allilla charingapakunata. 12 Chasallata, nuka kamkunawa, Jesucristowa iuiagkuna kagmanda, parijuma sumaglla iuiachinakungapami kagringapa munakuni.

13 Taitakuna i mamakuna, nuka munanimi, kamkuna kasa iachangapa: achka biajimi nuka munakurkani, kamkunapagma chaiagringapa. Chasa munakuspapas, imamandachar arkarispa, kunankama manara pudiriwá ringapa. Kamkunawa kagrispa, munakunimi, achka runakuna manara Cristowa tukuskakunata tandachingapa, paimandalla kangapakuna; imasami sug alpakunapi rurarkani: chasallata. 14 Chaiawakumi, tukuipi griegokunata i augkakunata Alli Willaita willagringapa. Chasallata iachagkunata i ñi ima mana iachagkunatapas Alli Willaita willagringapami chaiawaku. 15 Chimandami munakuni, nukanchipa Taitiku chasa munagpika, kamkuna Romapi kaugsanakuskatapas Alli Willaita

willagringapa.

*Alli Willaita uiaspa suma iuiarigkuna
kispiringapa pudiskamanda*

¹⁶ Nukata ñi imapi mana manchawanchu, Alli Willaita willaspa puringapa. Tukui chita uiaspa suma iuiarigkunata, Taita Diosmi pudí kispichingapa. Ñugpa, judiukuna; nispaka, mana judíu kagkunapasmi pudinkuna kispichii tukunga. ¹⁷ Chi Alli Willaipi kasami niraiá: chita uiagkuna, Cristowa suma iuiarispallami Taita Diospa ñawipi mana pandarig niraiankuna. Chasallatami ñugpamanda librupi willaraiá, kasa nispa:

Taita Diospa ñawipi alli
kawarig runaka,
paiwa suma iuiarispallami
kaugsanga.

Tukui runakuna, pandarig kaskakunamanda

¹⁸ Runakuna Taita Diusta mana manchaspalla, tukuipi jiru ruraspalla kaugsagkuna, sutipa Alli Willaita mana uiangapa munankunachu. Chi runakunawa Taita Dios, pai iapa rabiariSPA kagtami suma luarmanda kawachimungapa ka. ¹⁹ Chi runakuna, Taita Diosmanda ima iachariskata allillami iachankuna. Taita Diosllatami paikunata kawachimurka. ²⁰ Taita Diusta mana kawaspapas, pai wiñachiskakunata kawaspami paimanda allilla iachankuna pai tiagta. Kai alpa tiaskaoramandata, chi alpallawantami allilla kawachí, Taita Dios diltudupa tukui pudig tiagta. Chimandaka, paikuna mana ningapa pudinkunachu:

“Nukanchi mana iacharkanchichu”. ²¹ Taita Diosmanda chasa iachaspapas, mana paita nirkakunachu: “Kam, iapa suma atun Taita Diosmi kangi” u “Pai Siñur”. Chasapaka, ianga iuiaikunallowami kankuna. Chiwanka, paikunapa iuiaika mana iuiiaiugmi tukuska kankuna. Iana tutapisinami kaugsanakú. ²² “Nukanchi, iachami kanchi” nigpikunapas, paikuna upami tukuska kankuna. ²³ Taita Dios mana wañugta: “Kam, iapa suma atunmi kangi” ningataka, wañunga runakunasina rigcha ruraskatami iuiaripa munanakú. Chasallata, piskukunasina, chusku chakiiugkunasina i kulibrakunasina rigcha ruraskakunatapasm iuiarispalla kaugsanakú.

²⁴ Chimandami Taita Dios paikunata sakirka, imasa jiru iuiaskasina ruraspa kaugsangapa. Chasa sakii tukuspami, pai kikipura tukui pingaipa ruranakuspa kaugsanakú. ²⁵ Taita Diosmanda sutipa Alli Willaita uangataka, llulla willaikunatami paikuna uianakú. Chasallata, Taita Dios wiñachigta kungurisp, pai ima niskata munangataka, pai wiñachiskakunatami iuiaripa munanakú. Pai Taita Diusta nukanchi nisunchi: “Kam, imaurapas iapa suma atunmi kangi. Chasa kachu”.

²⁶ Chimandami Taita Dios paikunata sakirka, iapa pingaipa jiru iuiaikunata ruraspa kaugsangapakuna. Chasaka paikunapa warmikuna, kariwa kaugsanakuskata sakispa, kikin warmipura mana ruradirukunatami ruranakuspa kaugsanakú. ²⁷ Chasallata karikunapas, warmiwa kaugsanakuskata

sakispa, askurintimi munanakú, kikin karipura mana ruradirukunata ruranakungapa. Karipuralla pingaiachig ruradirukunatami ruranakuspa kaugsanakú. Chasa pandarigkuna, pai kikinkunapa kuirpupimi llakii nanai iukangapa kankuna.

²⁸ Paikuna mana Taita Diusta rigsingapa munaskamandami pai Taita Dios sakirka, paikuna jirulla iuiangapa; chasaka, mana chaiaskakunata ruraspa kaugsangapakuna. ²⁹ Paikuna, chasa tukui sug rigcha sug rigcha jiru iuiiakunawa junda kspa, jirumi tukuipi rurankuna. Kikinmandallami sugkunapata munarinkuna. Tukuipi jiru rurangapa iuiaspallami purinakú. Sugkunata jiru iuiaspallami kawankuna. Wañuchinkunami. Piñachirinakuspallami

rimanakú. Llullachinkunami. Sugkunamanda wasami rimankuna. ³⁰ Sugkunamanda iangami juchachinkuna. Taita Diusta mana munankunachu. Ainirinkunami. Atun tukuspa, nirinkunami: “Nuka, sugkunamanda masmi kani”. Maskankunami, imasa sug rigcha jirupas rurangapa. Paikunapa taitata i mamata mana uiankunachu. ³¹ Mana munankunachu alli iuiai apingapa. Paikuna rurangapa niskata mana rurankunachu. Mana pitapas kuiankunachu. Mana pitapas pasinsiankunachu. Ñi mailla mana pimandapas llakinkunachu. ³² Chasa jiru ruragkunatami Taita Dios niska ka: paikunata wañungapami chaiá. Taita Dios chasa niskata iachaspapas, mana sakinkunachu, chasakunata rurangapa. Sugkunapas chasallata jiru ruranakuskata paikuna kwaspa, alli

iuiachiiwami tukunkunata.

2

Taita Dios sutipa kaskata justisiag kaskamanda

¹ Chimandami kam, pi kaspapas, mana sug runakunata ningapa chaiá: “Jiru ruragmi kangí”. Kasa iuiarii: kam kikinpas, chi runakuna ruranakuskasinallatata ruragmi kangí. Chimanda, paikunata chasa nispa kagpi, kam kikinta Taita Diosmi justisianga. ² Iachanchimi, Taita Dios chasa jiru ruranakuskata diltudupa ninama sitaura, imasa sutipa kaskata justisiai ruradur kagta. ³ Chimanda kampas sugkunata: “Jiru ruragmi kangí” nispa, kam kikin chasallata rurag kaspapas, ¿imasatak iuiakungi, Taita Dios mana kamtapas diltudupa ninama sitangapa kagta? ⁴ Taita Dios iapa suma kuiaspa, mana utkalla piñarig kagmanda, chasataka, ¿manachu munakungi? ¿Manachu iachangi, Taita Dios chasa kamta kuiaspa kaiakugta, kam jiru ruraikunata sakispa, paiwa tukugsamungapa? ⁵ Chasa kaiakugpipas, kamba iuiái muruchu rumisina kaspera, mana paiwa tukungapa munangi. Chimanda, Taita Diusta rabiachiskata pai rabiariispa, alli justisiangapa kawachirig pucha chaiaurapa wakachirigsinami rurakungi. ⁶ Chiurami Taita Dios, tukuikunata imasa ruraskasina allilla u mana allilla kaskata kawachingapa ka. ⁷ Maikanpas alli ruraikunata mana sakispalla, suma pucha luarpi diltudupa kagringapa maskagkunataka: “Allimi kangí” nispa, mana puchukariduru suma kaugsaitami karangapa ka. ⁸ Ikuti maikanpas kikinmandalla

iuiarispá, sutipa willaskata mana uiaspa, jiru ruragkunawaka askurinti iapa rabiariispami kangapa ka. ⁹ Tukui jiru ruragkunapa almakunaka, iapa llakispa irkimi kangapa kankuna. Ñugpa, judiukuna; nispaka, mana judíu kagkunapasmi chasallata llakispa kangapa kankuna. ¹⁰ Ikuti tukui allilla ruragkunataka: “Allimi kangí” nispa, karangapami ka, suma pucha luarpi sumaglla kaugsagringapa. Ñugpa judiukunata; nispaka, mana judíu kagkunatapasmi chasallata karangapa ka.

¹¹ Taita Diospa ñawipi, ñi pipas mana tianchu sug rigcha. ¹² Chimanda, Moisés ima rurangapa willaskata mana iachaspalla jiru ruragkunaka, Moisés willaskapi ima niraiaskamanda mana justisiai tukuspami puchukaringapa kankuna. Moisés willaskata iachaspapas, jiru ruragkunaka, Moisés willaskapi ima niraiaskamanda justisiai tukuspami chasallata diltudupa ninama sitai tukungapa kankuna. ¹³ Moisés ima willaskata uiaspapas mana ruragta, Taita Dios mana ningapa kanchu: “Kam, mana pandarigmi kangí”. Moisés willaskata uiaspa allilla ruragkunami allillapi kankuna. ¹⁴ Mana judíu kagkunaka, Moisés willaskata mana iachaspapas, Moisés imasa willaskasina paikunapa suma iuiailawa allilla ruraspá kagpikunaka, paikunapa alli iuiaimi Moisés willaskasina allilla tukugsamú. ¹⁵ Paikuna, allilla ruraskawami kawachinkuna, Moisés imasa willaskasina paikunapa iuiapi charinakugta. Pai kikinkunapa alli iuiailatatami chita kawachí. Chiwanka, paikunapa iuiariillawa

kawarispami willaringapa kankuna, allilla u mana allilla ruraspa kaugsagtakuna. ¹⁶ Tukui runakuna imapas pakalla iuiaskata i ruraskata, Taita Diosmi Jesucristowa kawachingapa ka; chiurami willaringapa kankuna. Chasallatami nuka willaska Alli Willaipi niraiá.

Judiukuna, Moisés ima willaskata mana ruraskamanda

¹⁷ Maikan kampa nichu: “Judiumi kani; Moisés ima rurangapa willaskatami iuiarini”. “Taita Diospallami kani” iuiarispá, atunmi tukungi. ¹⁸ Taita Dios ima munaskata allillami iachangi. Moisés willaskata iachaikuspa, iachangimi allilla ruraita agllangapa. ¹⁹ Kasapasmi iuiarikungi: “Nawiwa mana kawagsinakunata, nukami allilla pusag kani. Iana tutasinapi kaugsagkunapa iuiaikunata punchaiachigsinami kami. ²⁰ Moisés willaskata iukaspá, Taita Diosmanda sutipa kaskatapasmí iachani. Chasaka, mana iuiaiiugkunata iuiachigmi kani. Wambrasinakunata iachachigpasmí kani”. ²¹ Kam chasa: “Sugkunata iachachigmi kani” iuiarispaka, ¿imapatak kam kikin mana allilla iuiaringi? “Mana sisakungi” nikuspaka, kam kikin, ¿imapatak sisangi? ²² “Mana sugpa warmiwa siriringi” nikuspaka, ¿imapatak kam kikin, sugpa warmiwa siriringi? Ianga diuskunata mana munaspaka, ¿imapatak kam kikin, chi diuskunata iuiariduru wasikunapi ima tiaskata sisagsina rurakungi? ²³ Moisés willaskata iukaskawa atun tukuspaka, ¿imapatak chipi ima niraiaskata wabutispa, Taita Diusta kamigsina

jiru rurakungi? ²⁴ Chasallatami ñugpamanda
librupi willaraiá, kasa nispa:

Kam judiukunamandami

mana judíu kagkuna Taita Diusta kamispa
kankuna.

²⁵ Moisés tukui ima niskata kam ruragpika,
judiukunapa marka kamba kuirpupi churara-
iaskaka allillami ka. Ikuti Moisés niskata kam
mana ruragpika, chi marka mana churaskasi-
nami niraiangapa ka.

²⁶ Chimanda maikanpas chi marka mana
churaska kagka, Moisés imasa niskasina
allilla rurakugpika, ¿manachu chi marka
churaraiaskasina niraiagsamú? ²⁷ Maikan chi
marka kuirpupi mana churaska kaspapas,
Moisés imasa niskasina allilla ruragka, paimi
kawachingapa ka, kam jiru rurag kagta.
Kam, chi marka churaraiaska kaspas, Moisés
niskata iachaspapas, mana allilla ruragmi
kangi. ²⁸ Sugkunapa kawaillapi alli iuiag
kagta kawarigka, mana alli judíu niraianchu.
Chasallata, judiukunapa marka kuirpupi
churaraiag, chillawa mana niraianchu, sutipa
judíu kagta. ²⁹ Paipa suma alli iuiái iuiaskawami
alli judíu niraiá. Chasallata, tukui jiru iuiáikunata
anchuchirig, chimi judiukunapa marka iukagsina
niraiá. Chi marka mana niraianchu Moisés imasa
willaskasina ruraskawa. Santu Ispirituwami
chasa marka churagsina niraiá. Chasa
niraiagkunata, kai alpamanda runakunaka mana
ningapa kanchu: “Allimi kangí”. Taita Diosmi:
“Allimi kangí” ningapa ka.

3

¹ Chasa niraiagpika, judíu kagpika, ¿imapitak alli ningapa niraiá? Chasallata judiukunapa marka churaska kagpika, ¿imapitak mas allilla kapunga? ² Achkapimi mas allilla kapunga. Kaiwami kallarirka: Taita Dios, pai iuiachikuskasina rimaitami judiukunata mingagsamurka. ³ Sug judiukuna paipa rimaita mana uangapa munagpikunaka, chika, ¿imatak niraiá? ¿Niraianchu, Taita Dios kikin, pai ima rurangapa niskata sakingapa kagta? ⁴ Chikar, ñi imapas manima. Tukui runakuna llulla kagpipas, Taita Dioska, imaurapas pai rurangapa niskata sutipami rurangapa ka. Chasallatami ñugpamanda librupi willaraiá, kasa Taita Diusta nispá:

Kam ima niskakunata rurag kagmanda, niikimi:
“Kam, allimi kangí”.

Chasallata, kam tukui ima ruraskata
kawariskaka,
tukuipi allillami kapungapa kangí.

⁵ Kunauraka, runakunapa iuiaiwami rimani. Sugka nichu: “Nukanchi mana allilla ruraskakunamandami Taita Dios alli justisiag kagta kawachirí; chika, ¿imatak niraiá? ¿Niraianchu, Taita Dios, nukanchiwa rabiariSPA, pandarikugta?”. ⁶ Ñi imapipas manima. Taita Dios kikin pandarii iukagpika, ¿imasatak pudintra, kai alpapi, kaugsagkunata allilla justisiangapa?

⁷ Kasapas iuiariSPA nichu: “Nukapa llullai balintra, Taita Dios mana llulla kagta mas suma iacharingapa. Chasakuna baligpika, ¿imawantak niwangapa ka, nuka pandariska kagta? ⁸ Chasapaka, nukanchi jiru ruraspalla

kaugsanakusunchi. Chasapika, paimanda tukui allillami tukugsamungapa ka". Chasallatami sugkuna, nukanchi iachachinakuskata juchachispa kankuna. Paikunatami chaiaku, diltudupa ninama sitangapa.

Tukuikuna, pandarig kaskamanda

⁹ Chasa kagpika, nukanchi judiukuna, ¿sugkuna-manda mas allichu kanchi? Ñi imapas manima. Ñami nirkaikichita, judíu i mana judíu kagkuna, tukuikunami pandariwa wataskasina kankuna. ¹⁰ Chasallatami ñugpamanda librupi willaraiá, kasa nispa:

Mana pandarig,
ñi sug mana tianchu.

¹¹ Taita Dios ima niskata,
ñi pipas mana iuiarig tianchu.
Taita Diusta maskagpas,
ñi sug mana tianchu.

¹² Tukuikunami, Taita Dios ima niskata sakispa,
sug rigcha ianga iuiaita katirkakuna.
Allilla ruragka, mana tianchu ñi sugllapas.

¹³ Paikunapa simi kanmi wañuskata pambadiru paskaraiaskasina.

Chi ukuma wañuska ismuska asnarikugsinami ka.
Paikunapa kalluwami llullankuna.
Paikunapa simiwa jiru rimaska, kulibra kanigsi-nami rurankuna.

¹⁴ Paikuna ima rimaskapipas,
jiru millaillawami kaminkuna.

¹⁵ Paikunapa chakiwa kalpankunami, wañuchispa,
iawar kawangapaglla.

¹⁶ Paikuna maipi puriskapipas,

tukuita llakichispa,
puchukaspami purinkuna.

¹⁷ Mana iachankunachu, imasa sumaglla
kaugsangapa.

¹⁸ Mana imaurapas iuiarinkunachu, Taita Diusta
manchangapa.

¹⁹ Kasami iachanchi: Moisés tukui ima
niskapi, chi niskawa wataskasina kagkunata ima
rurangapa willaraiá; chasaka tukui kai alpapi
kaugsagkuna, Taita Diospa ñawipi upalla kaspá,
paikuna jiru ruranakuskata kawachii tukungapa.

²⁰ Moisés niskata uiaspa ruraskakunallowaka,
mana pandarig, ñi pipas mana niraiangapa
kanchichu. Moisés niskawami iachagsamunchi,
nukanchi pandarig kagtakuna.

*Cristowa suma iuiarispa, mana pandarig nira-
iaskamanda*

²¹ Kunaureka, Moisés ima rurangapa willaskata
sakispa, Taita Dios iachachinmi, imasa
nukanchi mana pandarig niraiangapa. Moisés
i Santu Ispirituwa rimagkunapas, chasallatami
ñugpata willaska karka. ²² Jesucristowa suma

iuiarispami Taita Diospa ñawipi mana pandarig
niraianchi. Maimanda runakunapas, tukui
paiwa iuiarigkunami mana pandarig niraianchi.

²³ Tukuikunami pandarinchi. Chimandaka,
Taita Dios atun sumaiachiskamanda iapa
karupisinami karkanchi. ²⁴ Pai Taita Dioska,

tukuikunata suma kuiaspa, Jesucristowami
kispichí, nukanchi paita ñi ima mana karagpipas;
chasaka nukanchi, mana pandarigkuna
niraiangapa. ²⁵ Chasapika, Taita Dios nirka,

Jesucristo wañuchii tukuspa, paipa iawar ichariskawa nukanchipa pandariikunata anchuchingapa. Paiwa suma iuiarigmandami pasinsiai tukurkanchi. Ñugpamanda maituku pandarii ruragpikunapas, Taita Dios, nukanchimanda iapami llakii iukarka. Chasawami tukui chi pandariikunata kungarirka. Chasaka, Jesucristo wañuskawami kawachirka, pai imapipas imasa chaiaskasina allilla rurakugta. ²⁶ Kunaura kaugsagkunatapasmi kawachí, pai imapipas imasa chaiaskasina allilla rurakugta. Paillatatami nukanchita ni: “Jesuswa suma iuiarispami mana pandarig niraiangichi”.

²⁷ Chasa kagpika, ¿pudinchichu, Taita Diospa ñawipi atun tukungapa? Mana pudinchichu. ¿Imamanda? ¿Moisés ima niskata ruraskamanda? Manima. Jesuswa suma iuiarispami mana pudinchi, Taita Diospa ñawipi atun tukungapa. ²⁸ Chasamandami ninchi: maikanpas Jesucristowa suma iuiarispami mana pandarig niraianchi, Moisés ima niskata mana ruragpipas.

²⁹ Taita Dioska, ¿judiukunapallachu ka? ¿Manachu ka mana judíu kagkunapa Diospas? Ari, mana judíu kagkunapa Diospasmi ka. ³⁰ Taita Dios, sugllami tia. Paimi ka judiukunapa marka i mana marka churaskakunatapas nig: “Jesuswa suma iuiarispami mana pandarig niraiangichi”. ³¹ Chasa suma iuiarigpikunaka, Moisés ima rurangapa willaska, ¿iangachu tukugsamú? Ñi imapas manima. Chasapaka, ninchimi: “Masmi Moisés willaska, allilla ka”.

4

Ñugpamanda taita Abraham, Taita Dioswa suma iuiariskamanda

¹ Chasa kagpika, ¿imasatak niipa, nukanchipa ñugpamanda achala taita Abraham mana pandarig niraiagta? ² Abraham paipa allilla ru-raikunallowa mana pandarig niraiagpika, pai pudirkami, “Runapuramanda tukuipa mas allimi kani” iuiaringa; ikuti Taita Diospa ñawipika, chasaka manima. ³ Ñugpamanda librupi, kasami Abrahammanda willaraiá: Abrahamka, Taita Dios ima niskata iuiarispami karka:

“Chasami tukunga”.

Chimandami pai mana pandarig niraiá.

⁴ Maikanpas ima ruraskamanda kulki chaskigpika, mana niraiianchu kuiaspalla karaska. Paita chaiaskata chaskiskami niraiá. ⁵ Ikuti maikanpas, ñi ima mana rurasapas, Taita Dios pandarigkunata chaskigwa suma iuiarichu: chasa iuiarigmandami pai mana pandarigsina niraiá. ⁶ Ñugpamanda achala taita Davidmi pandariska runamanda nirka: “Taita Dios paita: ‘Mana pandarigmi niraiapuangi’ nigpika, iapa alli iuiachiiwami kanga”. Kasami nirka:

⁷ Jiru ruraskakunata pasinsiai tukuspa, pandarigkunata anchuchiskakunaka, iapa alli iuiachiiwami tukunkunata.

⁸ Maikan runa pandariskamanda, atun Taita Dios mana imapas nispa sakigpika, iapa alli iuiachiiwami kangapa ka.

9 ¿Judiukunapa marka churaskakunallatachu chasamanda alli iuiachiiwa tukungakunata? ¿Chi marka manara churaskakunatapaschu chasallata alli iuiachiiwa tukungakunata? Ñami ninchi: “Abraham Taita Dioswa suma iuiariillawa kagmandami pai mana pandarig niraiá”.¹⁰ ¿Imauratak paita nirka, mana pandarig niraiagta? ¿Judiukunapa marka ña churaska u manara churaska kaurachu chasa nirka? Churaska kaura, manima; manara churaska kagpitami chasa nirka.¹¹ Chasa niskauramandami Abraham judiukunapa marka churachirirka. Chi markawa kawachirirkami, Taita Dioswa suma iuiariillawa kagmanda, pai mana pandarig niraiaska kagta. Chimandami Abraham, Taita Dioswa suma iuiarigmanda, tukui paikunapa ñugpamanda achala taita niraiá, judiukunapa marka mana churaska kagpipas; chasaka paikunapas, mana pandarig niraiangapa.¹² Judiukunapa marka churaska kagkunapa ñugpamanda achala taitapasmi niraiá. Imasami Abraham, manara judiukunapa marka churachirirka, Taita Dioswa suma iuiarirka kausakurka: chasallatami paikunatapas kausangapa chaiá.

Taita Dios karangapa niskata, Abraham suiakuskamanda

¹³ Taita Dios, Abrahamta nirka: “Kamba wambrapa wambrakunapa kati wambrakunatami kai alpata karangapa kani”. Mana chasa nirkachu, Moisés ima niskata Abraham ruraskamanda. Taita Dioswa suma iuiariillawa kagmandami chasa nirka. Chasa

iuiariskamandami paita nirka, mana pandarig niraiagta. ¹⁴ Moisés niskallata ruraspa, Taita Dios niskata chaskingapa kagpika, iangami Taita Dioswa suma iuiarintranchi. Taita Dios niskapas, iangami tukontra. ¹⁵ Moisés niskata iachaspapas mana ruragkunawa, Taita Dios iapami rabiari. Ikuti Moisés niskata mana iachagkunaka, chi niskamanda mana pandariska niraianchu.

¹⁶ Chimanda, Abraham Taita Dioswa suma iuiariskamandami pai Taita Dios nirka, chasa karangapa, Chasaka, Abrahampa wambrapa wambrakunapa tukui kati wambrakunata, Taita Dios, suma kuiaspa, sutipami ima niskataka karangapa kankunata. Chika mana niraianchu, Moisés niskata ruragkunamandalla. Maikanpas Abrahamsina Taita Dioswa suma iuiarigkunamandapasmi niraiá.; Paimi tukui nukanchipa ñugpamanda achala taita ka. ¹⁷ Chasallatami ñugpamanda librupi willaraiá, Abrahamta kasa nispa: “Achka alpakunapi kaugsagkunapa iaia taita tukungapami agllarkaiki”. Taita Dios chasa niskatami Abraham suma iuiarirka. Taita Diosllatatami ka wañuskakunata kaugsachig i ñ ima mana tiaskakunatapas wiñachig.

¹⁸ Chasa Taita Dios, Abrahamta niska karka: “Kamta agllarkaikimi, achka alpakunapi kaugsagkunapa iaia taita tukungapa” i “Kamba wambrapa wambrapa kati wambrakuna, iapa achkakunami tukugsamungapa kankuna”. Chasa, Taita Dios niska mana tukungasina kagpipas, Abrahamka suma iuiaspallami suiakurka. ¹⁹ Pai ñalla patsa wata iukaspa, ñi sug

wambra mana iukaska karkakuna. Chasallata paipa warmi, chusami karka. Chasa kagpipas, Taita Dius ima niskata iuiaspallami Abraham suiakurka. ²⁰ “Taita Dius ima niskata mana chasa tukugsamungachu” iuiaringataka, paiwa mas sumami iuiarisa suiakurka. “Kam, iapa suma atunmi kangi” nispami iuiarikurka. ²¹ Pai, iuiariillapimi iuiakurka: “Imasami Taita Dius rimarka: chita tukuimi chasa tukugsamungapa ka”. ²² Chasa iuiariillawa kagmandami Taita Dius paita nirka: “Mana pandarigmi niraiangi”.

²³ Chasa willaraiaskaka mana niraianchu Abrahammandalla. ²⁴ Nukanchimandapasmi chasa willaraiá. Taita Dius nukanchipa Iaia Jesucristo wañuskata kaugsachigwa suma iuiarigkunatapasmi ningapa ka: “Mana pandarigkunami niraiangichi”. ²⁵ Nukanchipa pandariikunamandami Jesucristo wañuchii tukurka. Nukanchi mana pandarig niraiangapami pai, wañuspa, kaugsarirka.

5

Mana pandarig niraiaspaka, ima chaskiska-manda

¹ Nukanchi Iaia Jesucristowa suma iuiariskapi mana pandarig niraiaspaka, paimandami Taita Diuswa pasinsiachinakuska niraianchi. ² Paiwa suma iuiariskapimi pai kikinwa Taita Diuspa suma kuiaita chaskigsamurkanchi. Taita Dius nukanchita kuiaskawami allilla iuiarisa kanchi. Nukanchi paiwa suma puncha luarpi kagringapami suianakunchi. Chasa suianakuspaka, alli iuiachiiwami kanchi.

³ Kasapas. Ima llakiikuna chaiagpipas, alli iuiiachiiwami kanchi. Kasami iachanchi: chi llakiikunawaka iachachigta imapipas mana sambaiaspalla kaugsangapa. ⁴ Mana sambaiaspalla kaugsanakuskataka, Taita Dius ningami: “Allillami kaugsakungi”. Taita Dius chasa nukanchita nigpika, iapa suma iuiaiwami suianakusunchi. ⁵ Chasa iuiaiwaka mana ianga suianakusunchichu. Santu Ispiritutami Taita Dius nukanchita karamurka. Santu Ispirituwami iachanchi, Taita Dius nukanchita iapa kuiag kagta.

⁶ Nukanchi imasapipas mana kispirii pudinakugmandami, Taita Dius kikin agllaska puncha chaiaura, Cristo pandarigkunamanda wañugsamurka. ⁷ Maikan alli runamanda, maikanpas manachar wañuntra. Maikan iapa alli runamanda tiantrami maikan paimanda wañungapa. ⁸ Ikuti nukanchi ñi imapi mana alli runakuna kagmandami Cristo wañugsamurka. Chasapimi Taita Dius kawachigsamurka, imasa nukanchita sutipa iapa kuiagta.

⁹ Chasa Cristo wañuskamandami kunaura mana pandarig niraiianchi. Chasa kagmandami Cristolatata, tukurii puncha Taita Dius rabiakuskata nukanchita kispichigsamungapa ka. ¹⁰ Nukanchi manara Taita Diusta munag kaurami nukanchiwa i pai kikinwa pasinsiachigsamurka, paipa wambra wañuskamanda. Chasa pasinsiachinakui tukuskamanda, Cristopa kaugsaiwami tukurii puncha nukanchita kispichingapa ka.

¹¹ Kasapas. Iaia Jesucristowa nukanchi ña pasinsiachinakui tukuspa, paillawantami Taita

Diuswa alli iuiachiiwa kanchi.

Adanmanda i Cristomandu

¹² Suglla runamandami kai alpapi pandariikuna tukugsamurka. Pai pandariskamandaka, wañuipasmi chaiagsamurka. Chasallatami tukuikuna pandarirkakuna. Chimandami tukui runakunata wañui chaiarka. ¹³ Moisés ima rurangapa willaska manara tiagpitami ña kai alpapi pandariikuna tiarka. Chasa pandarigpikunapas, manara Moisés willaska tiagmanda, Taita Dius chi pandariskakunata mana justisiangapa iuiarkachu. ¹⁴ Mana iuiachigpipas, Adán pandariskauramandata Moisés kaugsankama, tukui pandarigkunami wañurkakuna. Adán, Taita Dius ima niskata mana uiarkachu. Sugkunaka, sug rigcha pandariikuna ruraspami wañurkakuna.

Adanta kawaspaka, niraiarkami katima sug runa samungapa kagta. ¹⁵ Chasa niraiagpipas, Adán pandariskawa i Taita Dius nukanchita karamuskawaka manima alli kanchu imasa ninga. ¹⁶ Ari, suglla runa pandariskawa i Taita Dius karamuskawa manima alli kanchu imasa ninga. Chasa, Adán suglla pandarii ruraskamandami Taita Dius, justisiai ruraspa, wañuita kachamurka. Ikuti Taita Dius nukanchita kispichigta kachamurka; paiwaka, nukanchi achka pandariikuna ruraspapas, mana pandarig niraiangapa. ¹⁷ Suglla runa pandariskamandami wañui chaiamurka, tukui runakunata mandagsina kangapa. Ikuti Taita Diuska, nukanchita iapa kuiaspami pasinsia, mana pandarig niraiangapa. Tukui chasa

niraiagkunaka, suglla Jesucristomanda paiwa mandangapami kaugsagringapa kanchi.

¹⁸ Chasamanda, imasami, suglla runa pandarii ruraskamanda, tukui runakunata wañui chaiarka: chasallata, suglla mana pandarig runa wañuskamanda, tukui paiwa iuiarigkuna, mana pandarig niraiaspa, kaugsagringapakuna.

¹⁹ Imasami, suglla runa Taita Dios niskata mana ruraskamanda, tukui runakuna pandarig niraiagsamurkakuna: chasallata, suglla runa Taita Dios niskata allilla ruraskamandami achka runakuna mana pandarig niraiangapa kankuna.

²⁰ Moisés ima rurangapa willaskaka tukugsamurkami, maikan pandariikuna kagta iacharingapa. Pandariikuna maituku achka tiagpipas, Taita Dioska paipa suma kuiaitami mas allipa kawachirka. ²¹ Imasami runakuna, pandariikunawa mandai tukunkuna wañunkama: chasallatami Taita Diospa suma kuiaiwa mandai tukunkuna; chasawaka, mana pandarig niraiaspa, nukanchipa Iaia Jesucristowa mana puchukaridiru suma kaugsaita iukangapa.

6

Pandaringapa wañuskasina kaspaka, Cristowa kaugariskamanda

¹ Chasa kagpika, ¿kasachu nisunchi: “Pandariilla apasunchi; chasaka, Taita Diospa suma kuiaita mas nukanchita kawachingapa”? ² Ñi imapas manima. Mana mas pandaringapa wañuskasinami kanchi. Chasa kaspaka, mana iukanchichu, ikuti pandarispa kaugsanakunga.

³ Tukui baugtisai tukuskakuna, Jesucristowa tukuspa, paiwa wañuskasinami niraiianchi. Chita, ¿manachu iachangichi? ⁴ Chimanda, nukanchi baugtisai tukuspa, paiwa pambai tukuskasinami niraiianchi, sugllapi wañuskasina niraiangapa. Chasaka, imasami Taita Diospa iapa suma iachaiwa Cristo wañuskata kaugsachirka: chasallata nukanchipas, musu kaugsaita iukaspa, kaugasasunchi.

⁵ Nukanchi Cristowa sugllapi wañuskasina niraiaspaka, paisinallatatami kaugsarisunchi, paiwa sugllapi kagringapa. ⁶ Kasami iachanchi: nukanchi ñugpa kaugsaska,

Cristowa kruspi klabaskasinami niraiarkanchi; chiwanka, nukanchipa pandaringapa iuiaikuna puchukarispas, pandariywa mana wataraiaskasina kaugsangapa. ⁷ Maikan pandariikunamanda wañuskasina kagpika,

wataraiaskamanda kachariskasinami tukú.

⁸ Nukanchi Cristowa sugllapi wañuskasina niraiaspaka, kasami iuiarinchi: kaugsarispas, paiwa sugllapi kagringapa. ⁹ Kasapasmi iachanchi: Cristo, wañuska kaugsarisapaka,

mana imaurapas ikuti wañungapa kagta. Wañui, mana ikuti paita chaiai pudingapa kanchu.

¹⁰ Tukuikunapa pandariikunamandami Cristo sug biajilla wañurka. Kaugsariskauramandaka, Taita Diosmandallami kaugsaku. ¹¹ Chasamanda kamkunapas, mana mas pandaringapa

wañuskasina tukungichi. Jesucristowa iuiarispas, Taita Diosmandalla kaugsangichi.

¹² Chimanda, kamkunapa ismunga kuirpupi pandariikuna mandagsina mana tiachu. Chasa

tiagpika, imasa jiru iuiaskasina ruragkunami tukuntrangichi. ¹³ Chasallata, kamkunapa kuirpupi ima iukaskawa mana sakiriichi; chikunawaka, jiru rurangapa. Chasapaka, wañuspa, kaugsariskasina niraiaspa, Taita Diospa lutrinsina tukuichi. Kamkunapa kuirpupi ima iukaskakunatapas paita iukachiriichi; chikunawaka, tukuipi allilla rurangapa. ¹⁴ Chasaka pandariikuna, kamkunapa kuirpupi mana mandagsina tiangachu. Moisés ima rurangapa willaskawa mana wataskasina kangichichu. Taita Diospa suma kuaipimi wataraiaskasina kangichi.

Taita Dios ima niskata rurangapa, paipa lutrinsina tukusunchi

¹⁵ Chasa kaspaka, ¿kasachu nisunchi: “Moisés niskawa ña mana wataskasinami kanchi. Taita Diospa suma kuaipi wataraiaskasinami kanchi. ¿Chimandachu pandarisunchi?”? Ñi imapas manima. ¹⁶ ¿Manachu kasa iachangichi? Maikan, patrunpa lutrin tukuspa, iukanmi pai ima niskata ruranga. Pandariikunawa wataskasina tukugpika, paita wañuimi chaianga. Ikuti Taita Dios ima niskata rurangapa paipa lutrinsina tukugpika, allilla ruraspami kaugsanga. ¹⁷ Kasamandami Taita Diusta: “Pai Siñur” nipuikichita: kamkuna, pandariikunawa wataskasina kaspapas, kunauraka Cristomanda iachachiskata uiaspa, tukui iuiaiwami pai ima niskata ruraspakaugsanakungichi. ¹⁸ Pandariikunawa wataraiaskamanda kachariskasina tukuspaka,

Taita Diospa lutrinsinami tukurkangichi, allilla ruraspa kaugsangapakuna. ¹⁹ (Kamkuna, nuka iachachikuskata manara allilla iui ai apingichichu. Chimandami runakuna uiangasina rimaspa iachachinakuikichita.) Ñugpata, kamkunapa kuirpupi ima iukaskawami sakirirkangichi, wataskasina, jiru mana chaia ruraspa kaugsangapa. Kuna uraka chasallata, kamkunapa kuirpupi ima iukaskata Taita Diusta iukachiriichi; chikunawaka, allilla ruraspa, paimandalla sumaglla kaugsangapa.

²⁰ Kamkuna pandariikunawa wataskasina kaugsanakuspaka, Taita Diospa lutrinsina mana karkangichichu, imapias allilla ruraspa kaugsangapa. ²¹ Chi jiru ruraskamanda, ¿imaták chaskirkangichi? Chasa ruraskakunamandaka, kuna ura kamkunata iapa pingaipami iuiachiku. Chasa ruragkunaka, wañuillami chaskinkuna.

²² Ikuti kuna uraka, pandariikunawa wataraiaskamanda kachariskasina tukuspa, Taita Diospa lutrinsinami tukurkangichi. Chasa, paipalla kaspá, mana puchukaridiru suma kaugsaitami chaskigringapa kangichi.

²³ Pandarispá ruragka, wañuitami chaskí. Ikuti Taita Dioska, nukanchipa Iaiá Jesucristowa mana puchukaridiru suma kaugsaitami kará.

7

Moisés ima rurangapa willaskamanda kachariskasina tukuskamanda

¹ Kam taitakuna i mamakuna, Moisés ima rurangapa willaskata allillami iachangichi. ¿Manachu kasapas iachangichi? Maikanpas chi

willaskawa mandai tukugka, kaugsankamallami chita rurá. ² Kusaiug warmika, kusa kaugsankamami imasa Moisés niskasina iuká, kusawa wataskasina kanga. Ikuti kusa wañugpika, Moisés niskata wataraiaskasina kaskamanda kachariskasinami tukú. ³ Kusa chara kaugsakugpita, chi warmi sug kariwa sugllapi kaugsagrigpika, iapa atun pandariimi rurá. Ikuti kusa wañugpika, Moisés niskata wataraiaskasina kaskamanda kachariskasinami tukú. Nispaka, sug kariwa kasaragpika, ñi ima pandarii mana niraiianchu.

⁴ Chasallata, nukapa kuiaska taitakuna i mamakuna, Cristo wañuskamanda, kamkunapas, wañuskasina niraiaspa, Moisés ima rurangapa willaskamanda kachariskasinami kangichi; chasaka, sug kusa niraiagsina Cristowa tukungapakuna. Cristo wañuspa kaugsarigwami kunaura tukunchi; chasaka, Taita Diosmanda tukuipi allilla ruraspa kaugsangapa. ⁵ Nukanchipa kuirpupi iuiailawa ruraspa kaugsanakuspaka, Moisés ima rurangapa willaskawami iuiachii tukurkanchi, nukanchi imasa munaskasina pandarispa kaugsangapa. Chasa kaugsaspaka, Taita Diospa ñawipi wañuskami niraiarkanchi. ⁶ Ikuti kunaureka, Cristowa wañuska niraiagsamuspa, Moisés ima rurangapa willaskamanda kachariskasinami tukurkanchi; chasaka, Taita Diospa lutrinsina allilla ruraspa kaugsangapa. Ñugpa willaraiaska niskamanda, manima; Santu Ispirituwa musu kaugsaita iukaspami paipa lutrinsina allilla ruraspa kaugsanakunchi.

Pandaringapa iui, nukanchipa kuirpupi tiaskamanda

⁷ Chasa kagpika, ¿nisunchichu, Moisés ima rurangapa willaska, pandarii niraiagta? Ñi imapas manima. Mana chasa kagpipas, Moisés willaska mana tiagpika, manami iachangapa karkani ima ruraikuna pandarii niraiagta. Moisés niskapi willaraiá: “Sugkuna iukaskakunata mana munaringi”; mana chasa willaraiagpika, manami iachangapa karkani sugkunapata munarii, pandarii niraiagta. ⁸ Chasa kagpipas, Moisés niska tiaskamandaka, pandarii kaskata iachagsamuskawami iuiachiriwarka, tukui ima sugkuna iukaskata munaringapa. Moisés niska mana tiagpika, chi pandariikuna wañuskasinami niraiantra. ⁹ Nuka ñugpata Moisés ima rurangapa niskata mana iachaspallami kaugsakurkani. Moisés niskata nuka iachagsamuuraka, pandariikuna nukapa iuiaipi kaugsarigsinami tukugsamurkakuna. ¹⁰ Chiura nukaka, Taita Diuspa ñawipi wañuskami tukurkani. Chasaka, Moisés niskata chaskispa, kaugsaita iukangataka, wañuska kagsinami tukurkani. ¹¹ Chasaka, Moisés niska tiaskamanda, chita iachaspa, pandariikunawami pandachii tukurkani. Chi niskapi pandarispami wañuskasina tukurkani.

¹² Moisés tukui ima rurangapa willaskaka, ñi ima mana pandariipi niraianchu. Tukuipi allilami ka. Tukuipi allipami niraiá. ¹³ Chasa kagpika, ¿chi alli willaskawachu wañuskasina tukurkani? Ñi imapas manima. Pandariskawami wañuskasina tukurkani. Chi alli willaskawami pandarii ima

kaskata iachagsamurkani. Chasa iachaspami, pandarispa, wañuskasina tukurkani. Chasaka, Moisés willaskawami kawachí, pandariikuna ruraika, iapa mana allilla kagta.

¹⁴ Iachanchimi, Moisés ima rurangapa willaska, Santu Ispíritu iuiachiska kagta. Ikuti nukaka, kai kuirpupi kaugsankama, katuskasina kaspá, pandariikunawa wataraiaskasinami kani. ¹⁵ Nuka mana iachanichu ima rurakugta. Nuka ima allilla rurangapa munakuskata mana ruragmi kani. Ikuti ima mana rurangapa munaskataka, chitami rurani. ¹⁶ Nuka ima mana munakuskata ruraskawami iuiarini, Moisés niska alli kagta. ¹⁷ Chasa kagpipas, nuka kikin mana munanichu, chi jiru ruraikunata rurangapa. Pandaringapa iuiái nukapa kuirpupi tiaskawami chikunata munachiwá rurangapa. ¹⁸ Iachanimi, nukapa kuirpupi mana ñi imapas alli iuiái tiagta. Ima allilla rurangapa iuiái samuwagpipas, mana pudinichu chita rurangapa. ¹⁹ Allilla rurangapa munakuskata mana rurani. Ikuti jiru rurangapa mana munakuskataka, chitami rurani. ²⁰ Chasa nuka mana rurangapa munakuskata ruragpika, nuka kikin mana munanichu, chi jiru ruraikunata rurangapa. Pandaringapa iuiái nukapa kuirpupi tiaskawami chikunata munachiwá rurangapa.

²¹ Chimandami iachani, nuka allilla rurangapa munakuura, pandaringapa iuiái, nukapa kuirpupi tiagta. ²² Nukapa iuiaipika, Taita Dios ima niskatami allilla rurangapa iuiani. ²³ Chasa kagpipas, nukapa kuirpupika sug rigcha jiru mandai tiagtami kawani. Chi jiru mandai nukapa kuirpupi tiaspaka, suma iuiaipi kaska

mandaskawa makanakugsinami tukugsamú. Chi jiru mandaika, wataskasinami chariwaku. Chasaka, pandariikuna rurangapagllami munachiwá.

²⁴ ¡Ai nukajim, imachar pasasa! ¿Pitak pudí, kai kuirpu diltudupa wañuima chaiachiwakugriskata kispichiwangapa? ²⁵ Taita Diosllami pudí, nukanchipa Iai Jesucristowa kispichiwangapa. Chimandami Taita Diusta: “Pai Siñur” nini. Chasaka, nukapa iuiaiwa Taita Dios niskatami rurag kani. Ikuti nukapa kuirpuwaka imapipas pandarispami kani.

8

Santu Ispíritu iuiachiskasina kaugsasunchi

¹ Kunaura, Jesucristowa tukuskakunaka, manima diltudupa ninama sitai tukungapa kankunachu. ² Santu Ispíritu iuiachiska mandaiwaka kaugsaitami kará; chi mandaiwami jiru pandariikunata Jesucristomanda kispichiska kanchi; chasaka, mana diltudupa wañuima chaiagringapa. ³ Nukanchi pandarigkuna kaskamanda, Moisés ima willaskawa mana rurangapa pudiriskata, Taita Diosmi rurarka. Pai kikinpa wambrata kachamuspami chasa rurarka. Cristoka, pandarigkunapa kuirpuwasina aichaiug tukuspa, nukanchipa pandariikunamandami wañugsamurka. Chasaka, Cristopa kuirpuwami nukanchipa pandariikunata puchukaspá chingachirka; ⁴ chasaka, Moisés ima niskata nukanchi rurai pudingapa. Nukanchipa kuirpupi iuiaillawa

ruraspa mana kaugsanakunchichu. Santu Ispíritu ima iuiachiskallowami chasa kaugsanakunchi.

⁵ Maikanpas kikinpa kuirpupi iuiaillawa kaugsag, kai alpapi ima tiaskakunallowami iuiaspalla kanga. Ikuti Santu Ispíritu iuiachiskallowa kaugsagka, chasallata Santu Ispiritumanda allilla iuiaspallami kanga.

⁶ Kai alpapi ima tiaskakunallowa iuiagkuna, diltudupa wañuimami chaiagringakuna. Ikuti Santu Ispirituwa allilla iuiagkunaka, sumaglla kaugsaitami tarinkuna.

⁷ Kai alpapi ima tiaskakunallowa iuiagkuna, Taita Diustami mana munankuna. Pai ima nikuskata mana uiagkunami kankuna. Mana pudinkunachu, pai ima nikuskata uiangapa. ⁸ Maikanpas kikinpa kuirpupi iuiaillawa kaugsagkuna, Taita Diusta mana pudinkunachu kuntintachingapa.

⁹ Taita Diospa Ispíritu kamkunapa iuiaipi sutipa kaugsakugpika, kam kikinkunapa kuirpupi iuiaillawa mana kaugsangapa kangichichu. Santu Ispíritu ima iuiachiskallowami kaugsangapa kangichi. Maikanpas Cristopa Ispirituta mana iukaspaka, Cristopa mana kanchu.

¹⁰ Cristo kamkunapa iuiaipi kaugsakugpika, kamkunapa kuirpu pandariskamanda wañungapa kagpipas, kamkunapa ispirituka kaugsami ka, kamkuna mana pandarig niraiaskamanda.

¹¹ Taita Dios, Jesucristo wañuskata kaugsachigpa Ispíritu kamkunapa iuiaipi kaugsakugpika, kikin Taita Dioska kamkunapa wañuska kuirputapasmi diltudupa kaugsachingapa ka. Paipa Ispíritu kamkunawa kaugsakuspami chasa kaugsachingapa ka.

¹² Chasamanda, taitakuna i mamakuna, mana iukanchichu, nukanchipa kuirpupi iuiakuskallawa kaugsanga. Santu Ispíritu ima iuiachiskallawami kaugsai iukanchi.

¹³ Kam kikinkunapa kuirpupi iuiakuskallawa kaugsanakupika, diltudupami wañungapa kangichi. Ikuti Santu Ispirituwa kamkunapa jiru rurangapa iuianakuskata sakigpikunaka, diltudupa kaugsaitami tarinkangichi.

¹⁴ Taita Diospa Ispíritu ima iuiachikuskata tukui katiraiagkuna, chikunami Taita Diospa wambrakuna niraianchi. ¹⁵ Kamkuna, watara-iangasina ispirituta mana chaskirkangichichu, ikuti manchaiwa kaugsangapa. Taita Diospa Ispiritutami chaskirkangichi; chasaka, paipa wambrakuna tukungapa. Santu Ispirituwami, Taita Diusta kaiaspa, ninchi: “Taitiku”. ¹⁶ Kikin Santu Ispiritumi nukanchipa ispirituta iuiachispa willá, Taita Diospa wambrakuna kagta.

¹⁷ Paipa wambrakuna kagmanda, Taita Dios iukaskaka Cristo kikipami ka; chiwanka, nukanchipapasmi niraiá. Nukanchi kai alpapi Cristosina llakii pasagpika, paiwa suma pucha luarpimi kagrisunchi.

Sug luarpi, iapa suma punchapi kagringapa kaskamanda

¹⁸ Kasami nini: kai punchakuna kaugsanakunkama iapa llakiikuna pasagpiku- napas, nispaka Taita Dios sug luarpi iapa sumami nukanchita kawachingapa ka. Chasa iuiarigpika, chi llakiikuna mana imapas niraiangapa kanchu.

¹⁹ Taita Diospa wambrakuna, sumagllami

sug luarpi kawarigringapa kanchi. Tukai ima Taita Dios wiñachiskakunapas, askurinti munaspami suianakú, chi puncha chaiangapa. ²⁰ Tukai ima Taita Dios wiñachiskakuna, runa pandariskamanda maldisiimi tukurka. Chi wiñachiskakuna kikinpa munaimandaka, manima; Taita Dios chasa munagmandami chasa tukugsamurka. ²¹ Chasa tukugpipas, Taita Dios pai ima wiñachiskata chasa maldisiskata kispichingapa kagtami iuiianchi; chasaka, mana puchukaringapa. Taita Diospa wambrakuna, kispichiska, suma puncha luarpi kaugsai kallarigriurami tukui ima pai wiñachiskakunapas maldisiskata kispichiskallatata tukungapa kankuna.

²² Kasami iachanchi: imasami unguringapa warmi, uchulla iukangapa puncha chaiaura, nanaimanda wakai kallari: chasallatami tukui ima Taita Dios wiñachiskakuna, kunankama wakanakugsina apanakú. ²³ Kasapas. Nukanchi kikinkunapasmi, Santu Ispirituwa kaspá, iuiaipi uchinanakugsina llakii iukanchi. Santu Ispirituta iukagmanda nukanchita kawachinmi, suma luarpi imapas chaskigringapa kagtakuna. “Nukapa wambrakunami kangichi” Taita Dios nukanchita kaiangapa puncha chaiangapa, askurinti iuiaillami suianakunchi. Chi punchami nukanchipa kuirputapas sumaiachiska kangapa ka. ²⁴ Chasa suianakuskawami kispichii tukurkanchi. Ima suianakuskata ña makipi charinakuspaka, ¿imatak mas suianakusunchi? ²⁵ Ikuti ima iukangapa suianakuska manara chaiamugpika, iukanchimi chi iuiaita upalla

suianakunga.

²⁶ Nukanchi sambaiaskasina kaura, Santu Ispir-
itullatami aidá. Mana iachanchichu, imasa
chaiakuskasina Taita Diusta mañangapa. Chasa
kagpipas, kikin Santu Ispiritumi nukanchimanda
paita mañá. Mana rimai pudigsinami wakaspa
mañá. ²⁷ Taita Dius, tukuikunapa iuiaita iachagmi
iachá, Santu Ispíritu ima mañakugta. Santu Ispíritu,
Taita Dius ima munakuskasinami Taita Diuspalla
kagkunamanda mañá.

*Cristowa, nukanchi tukuipi binsigkuna kaska-
manda*

²⁸ Kasami iachanchi: allilla u mana allilla
pasarigpipas, Taita Diusmi chasa ni, paita
kuiagkunamanda allillapa tukungapa. Pai
imasa munaskasina kawaspami nukanchita
kaiarka. ²⁹ Pai ñugpamandata rigsigkunatami
agllarka, pai kikinpa wambrasina kangapakuna;
chasaka paipa wambra, achka waugkindi
i panindikunamanda mas atun kangapa.
³⁰ Taita Dius ñugpamandata agllaskakunatami
kaiá. Kaiaskakunataka ninmi: “Kamkuna,
mana pandarigkunami niraiapuangichi”.
Chasa niraiaskakunataka, paipa suma puncha
luarmami pusá, sumaiachingapa.

³¹ Chasa kagpika, ¿imatak nisunchi? Taita
Dius nukanchiwa kagpi, ¿pitak pudinga,
nukanchimanda kuntra kanga? Ñi pipas
manima. ³² Taita Diusmi kikinpa wambrata mana
michaspalla kachamurka, tukuikunamanda
wañuchii tukungapa. Nigpika, ¿manachu paiwa
nukanchita tukui allilla chasallata karangapa ka?

³³ Taita Dios kikin agllaskakunata, ¿pitak pudinga, paikuna ima pandariikuna iukagta ningapa? Ñi pipas manima. Taita Dios kikinmi timpu paikunamanda niska karka: “Cristo wañuchii tukuskamandami mana pandarig niraiangapa kankuna”. ³⁴ Nigpika, ¿pitak pudinga, nukanchita diltudupa ninama sitangapa? Ñi pipas manima. Jesucristo, wañuchii tukuspa kaugsarispami Taita Diospa alli ladu kagrí; paimi nukanchimanda tukui sumaglla mañaku. ³⁵ Cristo nukanchita iapa kuiagmanda, ¿pitak pudinga, nukanchita paiwa kaskamanda anchuchingapa? Llakii, ñi nanai, ñi iarkai, ñi mana katanga iukai, ñi manchai, ñi jiru iuiaspa kalpachigkuna ñi wañuchigkuna, ñi pipas mana pudingapa kanchu, Cristowa kaskamanda nukanchita anchuchingapa. ³⁶ Chasallatami ñugpamanda librupi willaraiá, kasa Taita Diusta nispa:

Kammandami nukanchita chisiagta suianakú wañuchingapa.

Ubijata wañuchingapa munanakugsinami

nukanchita kawanakú. ³⁷ Tukui chi llakii pasagpikunapas, Cristo nukanchita kuiagmandami tukuipi suma binsispa llugsinchi. ³⁸ Chasallata, allillami iachani, Taita Dios, nukanchipa Iaia Jesucristowa nukanchita kuiagta. Pai kuiagmandami mana imawapas pudiringapa ka, Cristowa kaskamanda nukanchita anchuchingapa. Chasa, ñi wañuiwa ñi kaugsaiwapas, ñi anjilkunawa ñi kuku wairakunata mandagkunawapas, ñi kunaura ñi kipama

ñi imaurapas, ³⁹ ñi sug luarpi ñi kai alpa ukupi ima tiaskakunawapas, ñi Taita Dios sug ima ruraskakunawapas mana pudiringapa kanchu, Cristowa kaskamanda anchuchingapa, Taita Dios nukanchita kuiagmanda.

9

Taita Dios, Israelmanda runakunata agllaskamanda

¹ Nuka, Cristowa iuiaripa kaskamandami sutipa kaskata niikichita, mana llullaspalla. Santu Ispíritu iuiachiwakuskawa, nukapa iuiapi chasallatami mana llullaspalla kasa niikichita. ² Nuka, imaurapas iapa llakiiwami kani. Nukapa llakiipi, sungu nanagtami llakispa kani. ³ Nukapa waugkindi judiukunamandami chasa llakiiwa kani. Paikuna Cristowa tukuntrakuna iuiaripa, Taita Diusta mañantrani, nuka kikinka, Cristomanda anchuchii tukuspa, maldisiskapas tukungapa. ⁴ Paikuna, ñugpamanda achala taita Israelpa iawarmi kankuna. Taita Diosmi paipa wambrakunatasina charirka; chasaka, paiwa sumaiachiska kangapakuna. Paikunawami Taita Dios ikuti ikuti allilla tukugsamurka; chasaka, sugllapisina kangapa. Paikunamandami Moisés imasa ruraspa kaugsangapa niraiaskata chaskirka. Chimandaka iachachirkakunatami, imasa ruraskakunawa Taita Diusta kunguringapa chaiagta. Paikunatami Taita Dios nirka: “Nuka agllaska Cristo samungapa kaskata suiangichi”. ⁵ Paikunami kankuna nukanchipa ñugpamanda achala taitakunapa wambrakunapa

kati wambrakuna. Paikunapuramandami Cristo runa tukugsamurka. Paika, tukuipi iaia mandag Diosmi ka. Imaurapasmi paita iapa suma atun kagta nisunchi. Chasa kachu.

⁶ Mana ninichu, Taita Dios, Israelmanda runakunata karangapa niskata mana karagta. Ninimi: ñugpamanda achala taita Israelpa wambrakunapa kati wambrakuna, mana tukuikuna, Diospa ñawipi paipa wambrakuna niraiagta. ⁷ Chasallata, ñugpamanda achala taita Abrahampa wambrakunapa wambrakunapas, tukuikuna, Diospa ñawipi paipa wambrakuna mana niraiankunachu. Chasapaka, Taita Diosmi Abrahamta nirka:

Kamba wambra Isaakmandallami achka wambrakuna niraiapungapa kangi.

⁸ Chasa nispaka, Abrahampa wambrakuna kagmandalla, Taita Diospa wambrakuna mana niraiangapa kankunachu. Taita Dios Abrahamta wambra karangapa niskamanda tiagsamuska wambra wambrakunallami paipa wambrakuna niraiangapa kankuna. ⁹ Kasami Taita Dios, Abrahamta nirka:

Ima killa chaiamuurami kutimusa.

Chi killami kamba warmi Sara kari wambra iukangapa ka.

¹⁰ Kasapas. Nukanchipa ñugpamanda achala taita Isaakpa warmi Rebeka, iskai kari wambrakunami suuralla iukarka. ¹¹⁻¹² Chi wawakuna manara tiagsamugpita, Taita Dioska Rebekata niska karka: “Ñugpa tiagsamuska wambra, kati wambra ima niskata ruragmi

kangapa ka”, paikuna ima allilla u mana allilla manara ruragpikuna. Chasaka, Taita Dius kikinmi kawachí, maikan paita allilla kawariskata ñugpamandata aglladur kagta. Chasa Rebekata nispaka, kawachirkami, allilla u mana allilla ruranakugpipas, pai imasa munaskasina agllagta. ¹³ Chasallatami ñugpamanda librupi willaraiá, kasa nispa:

Jakobtami kuiarkani.

Ikuti Esautaka mana munarkanichu.

¹⁴ Chasa agllaskamandaka, ¿imatak nisunchi? Taita Dius chasa agllaspaka, ¿mana allillachu rurarka? Ñi imapas manima. ¹⁵ Moiestami Taita Dius kasa nirka:

Maikanmanda nuka llakiriskamandami llakirisa. Chasallata, maikanta nuka kuiangapa munaskatami kuiasa. ¹⁶ Chasaka Taita Diuska, runakunata mana agllanchu, paikuna munanakuskamanda u ima allilla ruraskamanda. Taita Dius llakiriskamandallami pai pita munaskata agllá. ¹⁷ Chasallatami ñugpamanda librupi willaraiá. Kasami Taita Dius, Ejipto alpapi atun mandagta nirka:

Kasamandami kamta atun mandag kangapa churarkaiki:

nuka tukui pudig kagta kam nukamanda kawachingapa;

chasallata, tukui alpakunapi nuka Taita Dius kagta iacharigsamungapa.

¹⁸ Chasaka, maikanmanda Taita Dius llakiringapa munaskamandami llakirí.

Chasallata maikanta iui ai tutaia chingapa
munaskataka, paillami chasa pudí
rurangapa.

¹⁹ Chimanda, kamka niwankangichar: “Chasa kaspaka, ¿imapatak Taita Dios, maikan runatapas ni: ‘Mana allilla ruragmi kangí?’ Pai ima rurangapa munaskataka, ¿pisik pudinga: ‘Chitaka mana rurakui’ ningapa?”. ²⁰ Kam runa, ¿imaták kangí, Taita Diusta imasa rurakuskata tapuchingapa? Alpata ruraska mangaka mana pudingapa ka, ruragta tapuchingapa: “¿Imapatak chasa rurarwarkangí?”. ²¹ Alpata imapas ruragka, ¿manachu pudí, chi alpallatata sug kuashagsina atun punchakuna upiadiru ruranga; ikuti sugka, ianga punchakuna upiadiru ruranga?

²² Jiru ruraspa, diltudupa ninama sitai tukungapa kagkunata, Taita Diosmi suiarka, mana piñakuspalla; chasaka, pai rabiari spa, tukui pudig kagta kawachingapa. ²³ Chasallata, sugkuna-manda llakii iukaspa, ñugpamandatami agllarka, paiwa suma pucha luarpi kagringapa; chasaka, pai askurinti iapa atun suma kagta kawachingapa. ²⁴ Chi agllaskapi, nukanchipasmi kanchi. Judiupurakunapi i mana judíu kaskakunapipasmi agllarka. ²⁵ Chasallatami Oseas suti Santu Ispirituwa rimag willaska librupi willaraiá, kasa nispa: Mana nukapa runakuna kaskatami ningapa kani: “Nukapa runakunami kapuangichi”.

Mana kuiaskatami ningapa kani:
“Nukapa kuiaskami kapuangi”.

²⁶ Maipimi nirkani:

“Nukapa runakuna mana kangichichu”:
chillapitami ningapa kani:

“Taita Dios kausagpa wambrakunami kapuangichi”.²⁷ Ikuti Israelmanda runakunamandaka, Isaías suti Santu Ispirituwa rimag, kasa nispami willá:

Ñugpamanda achala taita Israelpa wambrakunapa wambrakuna kaskajusina achka mana kuintangasina kagpikunapas, maillakunallami kispiringapa kankuna.

²⁸ Atun Taita Dios, kai alpapi ima rurangapa niskata mana unaimi justisiagsamungapa ka.
²⁹ Isaiasllatatami ñugpata willaska karka, kasa nipa:

Tukui manduiug atun Taita Dios mana sakinmi, kati kati wambrakuna tiangapa; nukanchipas, Sodoma i Gomorra suti puiblukunasinami ña puchukariska kanchi.

Achka judiukuna, Alli Willaita mana uiaskakunamanda

³⁰ Chasa kagmandaka, ¿imatak nisunchi? Mana judíu kagkuna, Taita Diospa ñawipi alli kangapa mana maskanakugpipas, paikuna Cristowa suma iuiaripa kagmandami mana pandarig tukugsamunkuna. ³¹ Ikuti Israelmanda runakunaka, Moisés ima rurangapa willaskata katichiraiaspapas, mana pudirkakunachu, Taita Diospa ñawipi allilla tukungapa. ³² ¿Imapatak mana chasa pudirkakuna? Cristowa iuiaringataka, Moisés ima rurangapa willaraiaskallata katichiraiaspami mana pudirkakuna, Taita Diospa ñawipi allilla tukungapa. Imasami runakuna, rumipi takaripa urmankuna:

ñallapas chasallata Cristo kruspi wañuskamanda,
paikunata iapa mana sumami uiarigsamurka.
³³ Chasallatami ñugpamanda librupi willaraiá,
kasa nispa:

Kawamuichi. Sión lumapi,
atun rumisina runatami churani,
runakuna paita takaripa urmagsina tiangapa.
Ikuti maikanpas paiwa suma iuiaripa kagkuna-
mandaka,
Taita Dios manami kungaringa.

10

¹ Taitakuna i mamakuna, tukui iuiaiwa
iapa munaspami Taita Diusta mañakuni,
Israelmanda runakuna kispichii tukuchukuna.
² Paikunamanda willanimi: askurintimi
munanakú, Taita Dios ima niskata rurangapa.
Chasa munanakugpipas, pai ima munakuskataka
manara allilla iachankunachu. ³ Manara
iachankunachu, imasamanda Taita Dioswa mana
pandarig niraiagtakuna. Mana chasa iachaspami
munanakú, kikinkunapa allilla ruraikunallawa
mana pandarig niraiangapakuna. Chasa
iuiaspami Taita Dios ima niskata mana
munarkakuna suma uiangapa. ⁴ Moisés tukui ima
rurangapa niraiaskaka, Cristopimi puchukarirka;
chasaka tukuikuna paiwa suma iuiarigkuna,
mana pandarig niraiangapa.

⁵ Moisés ima niskata ruraspa, mana pandarig
niraiangapa kaskamandaka, Moisés kikinmi kasa
nirka: “Tukui ima niskata ruragkunami kaugsai
iukagta niraiangapa kankuna”. ⁶ Ikuti Cristowa
suma iuiaripa, mana pandarig niraiangapa

kaskamandaka, kasami willaraiá: “Kamba iuiiaipi mana ningi: ‘¿Pitak sug luarma sikanga?’,” Cristota nigringapa: “Uraikumui”. ⁷ “Chasallata, kamba iuiiaipi kasapas mana ningi: ‘¿Pitak alpa ukuma uraikunga?’,” Cristota nigringapa: “Wañuskakunapagmanda llugsimui”. ⁸ Chasapaka, kasami willaraiá:

Diuspa Rimai, kamba ladullapimi ka.

Kam kikinpa simiwami pudingi rimanga.

Kam kikinpa iuiaiwami pudingi iuiaringa.

Chi Rimaitami willanchi, Cristowa suma iuiaringapa. ⁹ Kamkunapa simiwa willaspami iukangichi, Jesús nukanchipa iaia kagta ninga. Kamkunapa iuiaiwami iukangichi suma iuiaringa, pai wañuskata, Taita Dios kausachiska kagta. Chasa iuiaiwa kagmandami kispichii tukungapa kangichi. ¹⁰ Kamkunapa iuiaiwa Jesucristowa suma iuiariskamandami mana pandarig niraiangichi. Simiwa Jesucristomanda willagmandami kispichii tukungapa kangichi.

¹¹ Chasallatami ñugpamanda librupi willaraiá, kasa nispa: “Paiwa suma iuiaripa kagkunamanda, Taita Dios manami kungaringa”.

¹² Judiukuna i mana judíu kagkuna, sug rigcha sug rigcha mana niraianchu. Jesucristo, tukuikunapa iaiami niraiá. Tukui paiwa suma iuiaripa mañagkunata, mana michaspallami ima mañaskata karamú. ¹³ Chasallatami willaraiá, kasa nispa:

Atun Taita Dioswa tukui suma iuiaripa mañagkuna

kispiriskami tukungapa kankuna.

¹⁴ Paiwa mana iuiarispalla kausanakuspaka, ¿imasatak paita mañagakuna? Paimanda ñi ima

mana uiaspaka, ¿imasatak paiwa iuiaringakuna?
 Ñi pipas mana paikunata Alli Willaita
 willagrigrpikunaka, ¿imasatak iachangakuna?
¹⁵ Paikunapagma Taita Dios ñi pitapas mana
 kachagpika, ¿pitak willagringa? Chasallatami
 willaraiá, kasa nispa:

Maikanpas Alli Willaita willangapa chaiamug-
 pika,
 iapa allimi uiarigsamú.

¹⁶ Maituku Alli Willaita willanakugpipas, mana
 tukuikuna munankunachu, chi willaita uangapa.
 Chasallatami Isaías kasa niska karka:

Taitiku, ¿pikunatak munarkakuna,
 nukanchi ima willaskata suma uangapa?

Maillakunalla. ¹⁷ Chasamanda, Alli Willaita uias-
 pami Cristowa iuiarii pudinchi. Chi Alli
 Willaita, pai kikin Cristo kachamuskami ni-
 raiá.

¹⁸ Chasa niraiagpipas, nuka tapuni: ¿man-
 achu Alli Willaita uiarkakuna? Chitaka allillami
 uiarkakuna. Chasallatami willaraiá, kasa nispa:
 Chi rimai, tukui kai alpapimi uiarigsamurka.

Maipi runakuna tiaskapipasmi iacharigsamurka.

¹⁹ Kasapasmi tapuni: chasa kagpika,
 Israelmanda runakunaka, ¿manachu chasa
 iacharkakuna ima niraiagta? Ñugpata, Moiseska
 kasami nirka:

Atun Taita Diosmi ni:

“Mana nukapa runakuna kaskata nuka agllaska
 kagmandami

iuiachingapa kaikichita,

paikunata mana allilla iuiaspa kawangapa.

Nuka, mana iuiiug runakunata agllaspa kag-
mandami
rabiachingapa kaikichita”.

²⁰ Isaiaspas, mana manchaspallami kasa nirka:

Atun Taita Diusmi ni:

“Mana maskawanakugmi
tariwarkakuna.

Mana nukamanda tapunakuskatami
kawarirkani”.

²¹ Ikuti Israelmanda runakunamandaka kasami
nirka:

Nuka ima niskata mana uiawaspa piñarispalla
kagkunataka chisiagtami

iskandi makikunawa
chaskingapa suiakurkani.

11

*Israelmanda runakuna, maillakuna
Cristomanda agllai tukuskakunamanda*

¹ Chasa kagmandaka, ikuti tapusa: Taita Dius,
¿pai agllaska runakunatachu wabutirka? Ñi ima-
pas manima. Nukapasmi Israelmandapura kani.
Nukapa ñugpamanda achala taita, Abrahammi
karka. Paipa wambra Benjaminpa iawarmi kani.

² Taita Diuska, pai ñugpamanda agllaska runaku-
nata mana wabutirkachu. Ñugpamanda librupi,
Elías suti Santu Ispirituwa rimagmanda willara-
iaskata, ¿manachu iachangichi? Paika, Taita Diusta
mañakuspa, Israelmanda runakuna mana allilla
kagtakuna willaspa, kasami nirka:

³ Taitiku, kamba Santu Ispirituwa rimagkunatami
wañuchirkakuna.

Kammanda rupachidiru altarkunatapasm
waglichirkakuna.

Nukallami chara kaugsa kani.

Nigpika, nukatapasmi wañuchiwangapa munanakú. ⁴ Chiura Taita Diuska, kasami paita ainirka:

Baal suti ianga diuspa ñugpa ladu mana kunguringapa, kanchis waranga runakunatami nukamanda wakachirirvani.

⁵ Kuna punchakunapas, chasallatami Taita Dius, Israelmanda runakunata suma kuiaspa, maikankunata agllaku. ⁶ Taita Dius, paipa iapa suma kuiaiwami agllaku; mana kanchu paikuna ima allilla ruraskamanda. Allilla ruraskamanda Taita Dius agllakugpika, pai suma kuiaska, ñi imapaschar mana niraiantira.

⁷ Chasa kagmandaka, ¿imatak nisunchi? Israelmanda runakuna maskarinakurka, mana pandarig tukungapa. Nigpika, manima chasa tarirkakunachu. Taita Dius agllaskakunallami mana pandarig tukugsamurkakuna. Ikuti chi sugkunataka paikunapa iui ai tutaiachiskasinami tukugsamurkakunata. ⁸ Chasallatami ñugpamanda librupi willaraiá, kasa nispa:

Taita Dius, paikunata iapa puñuipisina iukangapami iuiachirka;

chiwanka, ñawiwa kawaspapas,

mana kawagsina tukungapa;

rinriwa uiaspapas,

mana uiagsina tukungapa.

Kunankamami chasa runakuna tiankuna.

⁹ Davidpas, kasami chi runakunamanda nirka:

Moisés ima rurangapa willaska,

paikuna suma achka mikui iukagsinami ka.
 Chi willaraiaskapi urmangapa waskakunasina
 u tugllasinami tukupungapa kankunata.
 Chi tugllapi urmagkunataka
 diltudupa ninamami sitai tukungapa kankuna.
¹⁰ Paikunapa ñawi wichkaskasinami
 tukugsamungapa ka;
 chasaka, mana kawagsina tukungapakuna.
 Wasa pakiskasinami
 patariska imaurapas kangapa kankuna.

*Mana judíu kagkuna, kispiringapa pudiska-
 manda*

¹¹ Mana kagpika, ikuti tapusa: judiukuna
 chasa Cristomanda takarigsina ruraspa,
 ¿diltudupachu urmaskasina tukurkakuna? Ñi
 imapas manima. Kikin judiukuna Cristota
 mana uiaskamandami mana judíu kagkunaka
 pudinkuna kispiringapa; chiwanka judiukuna,
 chasa kawaspa, paikunasinallatata Cristowa
 tukugsamungapakuna. ¹² Judiukuna Cristota
 mana uiaspa sitai tukugmandami mana judíu
 kagkunaka, Taita Dioswa iapa iukagsina
 tukugsamurkakuna. Tukui judiukuna Taita
 Dioswa ikuti tukugsamuuraka, askurinti iapa
 suma allillami tukugsamungapa ka.

¹³ Kunauraka, kamkuna mana judíu
 kagkunatami kasa niikichita. Cristo
 kikinmi nukata kachamuwarka, mana judíu
 kagkunata Allí Willaita willaspa puringapa.
 Chimandami, nukapa suma allí iuiaita suma
 iuiarispá, chita willaspa purikuni, ¹⁴ kasa
 munaspa: ¡amalai nuka kikinpa runakunapas

munantrakuna, kamkunata kawaspa, Cristowa tukugsamungapakuna; chasaka, kispiringapakuna! ¹⁵ Taita Dius, judiukunata wabutispa, mana judiukunatami agllarka; chasaka, tukuikuna paiwa pasinsiachirispakangapakuna. Judiukunata Taita Dius ikuti kaiauraka, ¿imatak niraiangapa ka? Wañuska kaspera, kaugsariskami niraiangapa ka. ¹⁶ Kasapas. Ñugpa ruraska tanda Diuspalla niraiangapakagpika, tukui tanda rurangapachapuskapasmipaipalla niraiangapa ka. Chasallata, sachangu Diuspalla niraiangapakagpika, malkikunapasmipaipalla niraiangapa ka.

¹⁷ Alli olivos sachamanda sug malkikunata kuchuskasinami sug judiukunata tukurkakuna. Ikuti kamka, mana judíu kaspera, sachukupi wiñaska olivos malkisinami kangi. Chi malkita apaspa, alli olivos kuchuska malkimatarpuskasinami llutaska kangi. Chasaka, chi alli olivos sachangukunawa Diuspa kaugsaiwami kallarirkangi. ¹⁸ Chimanda, jujalallapas iuiakungi: “Alli olivos sachamanda kuchuska malkisinakunamanda mas allimi kani!” Chasa iuiaspaka, iuiarii, kamka mana anguta charig kagta. Chasapaka iuiarii: angukunami kamta charig kankuna.

¹⁹ Kasachar niwantrangi: “Chi malkikuna kuchugsinami tukurka, nukata chima tarpugsinallutaspa rurawangapa”. ²⁰ Ari. Judiukuna mana Cristowa iuiarigmandami chi sachamalki kuchugsina tukugsamurka. Ikuti kamka, paiwa suma iuiariskamandallami chi kuchuskamatarpuskasina llutaska tukugsamurkangi.

Chimanda, mana atun tukungi. Chasapaka, Taita Diusta suma kuiaspa manchaspalla iuiakungi. ²¹ Imasami Taita Dius, chi sacha kikinpa malkisinakunata mana chillapi sakirka: kampasmi chasallata pudingi pasanga, mana allilla kagpika. ²² Chimanda iuiarii, Taita Dius iapa alli kagta; chasallata, iapa rabiariig kagta. Paita mana uiagkunata iapa rabiariigmi ka. Ikuti kamwaka iapa allimi ka. Chasa kagmanda, kamka iukangimi, mana kungarispalla, Taita Dius kamwa iapa alli kagta iuiarispalla kanga. Kungarigpika, kampas chi sachamanda malki kuchuskasinami tukunkangi. ²³ Chi judiukuna Cristowa mana iuiarigkuna paita uiagsamugpikunaka, Taita Dius, chi sachamallatatami paikunata ikuti tarpugsina llutaspa ruragsamunga. Taita Diusmi pudí, chasallata ruragsamungapa. ²⁴ Sachukupi wiñaska olivos sachamanda malkita kuchuspa, alli olivos sachama tarpugsina llutaspmi kamta rurarka. Mana chasa rurangapa pudiringasina kagpipas, allillami chasa rurarka. Taita Dius, kamta chasa ruraspaka, ¿manachu mas allilla pudinga, chi alli olivos sachama judiukunata ikuti tarpugsina llutaspa ruranga? Ari.

Israelmanda runakunatapas, Taita Dius kispichingapa kaskamanda

²⁵ Taitakuna i mamakuna, munakunimi, manara pipas iachaskata kamkuna iachangapa; chasaka, kamkuna mana iuianakungapa: “Nuka, tukuimi iachani”. Israelmanda runakuna maikankunata iuiiai

tutaiachiskasinami tukurkakunata; chika, mana judiukunata maituku achka agllaska, Cristowa tukugsamunkama. ²⁶ Chasa tukugsamuurami tukui Israelmanda runakuna kispiringapa kankuna. Chasallatami ñugpamanda librupi willaraiá, kasa nispa:

Sión lumamanda, kispichigmi samungapa ka.

Paika, ñugpamanda achala taita Jakobpa
wambrakunapa wambrakuna jiru
ruraskakunatami
kispichigsamungapa ka.

²⁷ Nuka ñugpata paikunawa iuiarispá rimaskaka, kasami tukungapa ka:

paikuna mana allilla ruraskakunata nuka pasin-siaura.

²⁸ Israelmanda runakuna, Alli Willaita wabutispa, Taita Diusta manami munnagsamurkakuna; chasaka, kam mana judíu kagkunamanda allilla tukungapa. Chasa kagpipas, paikunapa ñugpamanda achala taitakunata Taita Dios agllaskamandami paipa kuiaska chara kankuna. ²⁹ Taita Dios ima karaskata mana kichunchu. Pai kikin agllaskakunata mana wabutinchu. ³⁰ Chasallata, imasami kamkuna, ñugpata mana Taita Diusta uiarkangichi; ikuti kunauraka, judiukuna paita mana uianakugmanda, pai kamkunamanda suma kuiaspa llakirirka: ³¹ chasallatami, judiukuna kunaura mana paita uiagkuna kagpipas, mas nispa paillatata ikuti judiukunamanda llakiringapa ka; imasami kamkunamanda llakirirka: chasallata. ³² Tukuikunatami Taita Dios sakirka, paita mana uiagkuna kangapa;

chasaka, tukuikunata suma kuiaspa llakirispa, pai kikin kispichingapakunata.

³³ Taita Dios, ña askurinti sumami kuiá. Ña askurinti iuiyai iachami ka. Pai ima iuiakuskata, ñi pipas mana iachangapa pudinchichu. Mana imapas pudinchichu, pai ima rurakuskata iachangapa ima niraiagta. ³⁴ Chasallatami ñugpamanda librupi willaraiá, kasa nispa:

Atun Taita Dios ima iuiakuskata, ñi pipas mana iachanchu.

Paita ñi pipas mana imapas iuiachinchu.

³⁵ Ñi pipas mana paita imapas ñugpa kararkachu, pai kutichingapa. ³⁶ Tukuimi paimanda karaska tia. Paimi tukui rurarka. Pai kikinmandami tukui ruraska tia. Paita imaurapas iapa suma atun kagta nisunchi. Chasa kachu.

12

Taita Diosmandalla sumaglla kaugsangapa

¹ Taitakuna i mamakuna, Taita Dios suma kuiaspa llakiskamandami kasa mañaikichita: kam kikinkuna, Taita Diusta kamarikusina iukachiriichi, paimandalla kaugsangapa; chasaka, pai suma kuntintulla kamkunata kawangapa. Chasami kamkunata chaiaku, tukui iuiyaiwa Taita Diusta suma atuniachingapa.

² Mana kaugsachi, kai alpamandakunallawa iuiarispa. Iukangichimi, Taita Dios kamkunapa iuiaita sug rigcha iuiachiskakunawa mas suma iuiarispa kaugsagakuna. Chasa kaugsaspaka, iachankangichimi, Taita Dios ima munakuskata rurangapa. Paipa ñawipi sumaglla kagta

kawachispami tukuipi allilla ruraspa iukangichi kaugsanga.

³ Taita Dios suma kuiawaskamandami tukui kamkunata kasa niikichita: imasa kikinmanda iuiyai iukaskamanda mas atun mana iukangichi iuianga. Chasapaka, imasami Taita Dios, pai imasa munaskasina sug sugta karamú, paiwa suma iuiarispa kangapa: chasallatami iukangichi iuiaringa. ⁴ Imasami suglla kuirpupi, chaki, maki, uma, imapas achka iukagpipas, sug sug rigcha, sug sug rigcha rurankuna: ⁵ chasallatami nukanchipas, achkakuna kaspapas, Cristowa suglla kagsina kanchi. Nukanchi tukuikunami suglla kuirpu niraianchi.

⁶ Taita Dioska, nukanchita sugta sug rigcha, sugta sug rigcha, pai imasa munaskasinami karamú, nukanchi kikinpura aidanakuspa kaugsangapa. Pai kikin Santu Ispirituwa rimangapa karamugpika, pai imasa iuiachiskasina willasunchi, paiwa suma iuiarispa. ⁷ Sugkunamanda tukuipi allilla rurangapa karamugpika, paikunamanda allilla suma rurasunchi. Sugkunata iachachingapa karamugpika, paikunata allilla iachachisunchi. ⁸ Sugkunata sumaglla iuiachingapa karamugpika, paikunata sumaglla iuiachisunchi. Kulki u imapas karangapa chaiagpika, mana karagsina iuiarispa karasunchi. Mandag kangapa chaiagpika, allilla iuiarispa suma mandachu. Ministiskakunata suma kawaspa, imapas karangapa chaiagpika, alli iuiachiiwa karasunchi.

*Cristowa tukuskakuna, imasa Diosmandalla
kaugsai iukaskamanda*

⁹ Tukui iuiaiwa sutipa allilla kuianakuichi. Mana munaichi jiru ruraikunata. Ikuti tukui allilla ruraikunataka suma ruraspa kaugsai.

¹⁰ Waugkindikunasina parijuma kuianakuichi. Sugkunata: “Nukanchimanda mas allimi ka” kam kikinpuramanda iuiarisa kaichi.

¹¹ Ima ruraikunapas allilla ruraichi, mana kilaspalla. Iaia Jesús imasa munakuskasina tukuipi allilla iuiarisa ruraichi.

¹² Paita suma iuiaiwa suiaspa, alli iuiachiiwa kaichi. Iapa llakiikuna chaimugpika, mana llaki-iwa kagsina kawachiichi. Mana sakiichi, Taita Diusta mañaspa kaugsangapa.

¹³ Taita Diospalla kagkunata ima ministiriska karaichi. Kamkunapa wasima pipas chaiagripika, sumaglla “Iaikui” niichi. ¹⁴ Kamkunata jiru rurangapa iuiaspa kawagkunataka niichi: “Taita Dios, kamta iapa kuiaspa kawapuachu”. Paikunata mana randichingapa iuiaichi. Chasapaka, Taita Diusta paikunamanda mañapuichi.

¹⁵ Alli iuiachiiwa kagkunawa kangapa chaiagpika, chasalata alli iuiachiiwa kaichi. Chasalata, wakanakuskawa kangapa chaiagpika, paikunawa llakii iukaichi.

¹⁶ Kam kikinpura sugllasina iuiarisa kaugsanakuichi. Atun tukugsina iuiarisa mana kaichi. Chasapaka, uchulla kaskakunawa sugllapi tukuichi. Mana iuiarisa kaichi: “Nuka, tukuimi iachani”.

¹⁷ Kamkunata mana allilla ruragkunataka mana randichiichi. Iuiariichi, tukuikunapa

ñawipi allilla ruraspa kaugsangapa. ¹⁸ Kamkunata imapas rurangapa chaiagpika, allilla ruraichi; chiwanka, tukuikunawa sumaglla kaugsanakungapa.

¹⁹ Nukapa kuiaskakuna, kamkunata mana munagkunataka mana chasallata randichiichi. Chasalla sakiichi. Taita Diosmi paikunata justisiangakunata. Chasallatami ñugpamanda librupi willaraiá, kasa nispa:

Atun Taita Diosmi ni:

“Nukami justisiasa.

Paikuna jiru ruragpikunaka,

nukatami chaiawaku,

chasallata paikunata rurangapa”. ²⁰ Ikuti:

Kamta mana munag iarkaiwa kagpika,

kam iukangimi mikui karanga.

Iakunaiwa kagpika,

iukangimi upiangapa karanga.

Kam chasa allilla ruragpika,

paitaka ñawi ruparispá,

pingaisinami iuiachinga. ²¹ Kamta ima jirukuna

rurangapa iuiaita mana sakiringi. Chas-

apaka, alli ruraikunawa jiru iuiaikunata

binsingi.

13

¹ Tukuikunami iukanchi, mandagkuna ima niskata uianga. Mandagkunata Taita

Dios mana churagpika, ñi pipas manachar tiantra. Kunaura mandagkunaka, Taita Dios

churaskakunami kankuna. ² Chimanda, chi

mandagkunata mana uiagkunaka, Taita Dios

mandangapa churaskatami wabutinkuna.

Chasa mana uiagkunaka justisiaimi tukungapa kankuna. ³ Mandagkunaka, alli ruragkunata manchachingapa mana kankunachu. Mana alli ruraspa kaugsanakuskata manchachingapami churaska kankuna. ¿Manachu munangichi, mandagkunata mana manhaspalla kaugsangapa? Chasa munaspaka, allilla ruraspa kaugsaichi. Chasa kaugsagpika, mandagkuna kamkunata ningapami kankuna: “Alli runami kangi”. ⁴ Mandagkunaka, Taita Diusta aidagkunami kankuna, kamkuna allilla kaugsangapa. Kamkuna imapi mana allilla ruraspaka, iukangichimi manhaspa kangakuna. Mandagkuna, Taita Diusta aidag kaspá, mana ianga barata charirinkunachu. Mana allilla ruragkunamandaka asutigkunami kankuna. ⁵ Chimandami cháiá, paikuna ima niskata uiangapa. Asutii tukungapa manhaspalla, manima; kamkunapa alli iuiapi iuiarispami iukangichi chasa uianga. ⁶ Paikuna mandagkuna kagmanda iukangichimi, paikunata kulki paganga. Mandagkuna, Taita Diusta aidagkuna kaspá, iukankunami imaurapas paikunata imasa cháiaskasina ruraspa kaugsanakunga.

⁷ Tukui mandagkunata imasa cháiaskasina kuaichi. Impuistu chaskigta kulki kuaichi. Rama * mañagtaka rama kuaichi. Suma kuiangapa cháiaskataka suma kuaichi. Suma rimai iukaskataka suma rimaichi.

⁸ Mana pitapas dibiichi. Iukaichi dibisinaka, kam kikinpura sumaglla kuianakuspa

* **13:7** Rama kuangapa niraiami imasa cháiaskasina kuntribusiun kuangapa.

kaugsangapaglla. Sugkunata kuiagkuna, tukui ima Moisés niskata allilla ruragkunami niraiankuna. ⁹ Chi niskapi, kasami willaraiá: “Mana sugpa warmiwa kariwa siriringi. Mana pitapas wañuchingi. Mana sisangi. [Mana pimandapas llullangi.] Sugkuna iukaskakunata mana munaringi”. Sug mandaikunapasmi tia. Chasa tiagpipas: “Kam kikintasinami iukangi, tukui runakunatapas kuianga”; chasa ruragpika, tukui ima Moisés niskata allilla ruragkunami niraiankuna. ¹⁰ Chasa kuiagkuna, mana pitapas jiru rurangapa iuiankunachu. Chimandami, chasa kuianakuspa kaugsanakugmanda, tukui ima Moisés niskata allilla ruragkuna niraiankuna.

¹¹ Kasapas iuiariichi: kuna punchakuna imasa kagta. Nukanchi Iaia Jesucristowa suma iuiaringapa kallariska, kunaaurami kispichii puncha sutipa ña chaiamuku. Chimanda, puñunakugsina niraiagkuna rigchhariichi.

¹² Tuta ña pakarii tukugsinami chaiamuku. Chimanda, iana tutapisina mana allilla ruraikunata sakisunchi. Wañuchinakudiru katanga churarigsina tukusunchi; chasaka, punchapisina kaugsangapa. ¹³ Punchapi purinakugsina, tukuipi allilla ruraspa kaugsanakusunchi. Mana kaugsasunchi, iapa mikuspa i machagta upiaspa. Chasallata, maikan kari warmiwa pandarispaspa i jiru ruraikunata ruraspa mana kasunchi. Mana piñachirinakuspalla i sugkunata jiru iuiaiwa mana kawaspalla kasunchi. ¹⁴ Chasapaka, Iaia Jesucristopa iuiaita churarigsina tukungichi. Mana iuiangichi, kam kikinkunapa kuirpupi ima jiru iuiaskasina rurangapa.

14

Cristowa sug tukuskakunata mana piñasunchi

¹ Manara Cristota allilla rigsigkunata sumaglla chaskiichi, mana imapipas llakichinakuspalla.

² Cristowa tukuskakuna, maikankuna iuiankunami, tukui mikui, mikudiru kagta. Ikuti sugkunaka, manara Cristota allilla rigsispa, iuiankunami, aicha mikuspaka, pandarig niraiagta. ³ Tukui mikuikunata mikugka, aicha mana mikugta mana wabutichu. Chasallata aicha mana mikugka, tukui mikuikunata mikugta mana ñi imapas nichu. Taita Diosmi iskandikunata ni: “Allillami ka”. ⁴ Kam, ¿imapatak sug patrunpa lutrinta ningi: “Mana allilla ruraspami kangi”? Pai allilla u mana allilla rurakuskata, kikin patrunmi iuká kawanga. Chasa kagpipas, Iaia Jesusmi paita aidanga, allilla tukugsamungapa. Chimandami mikug u mana mikug kaskakunata pai ningapa ka: “Allillami ka”.

⁵ Kasapas. Sugkuna iuiankunami, sug puncha, sugkunamanda mas atun wardadiru tiagta. Ikuti sugkunaka iuiankunami, ñi imapas mana atun wardadiru puncha tiagta. Kamkuna imasa mas suma rurangapa iuiariskata ruraspa kapuaichi.

⁶ Maikanpas wardadiru puncha samakuspaka, Iaia Jesusmanda iuiarisa samachu. Tukui mikuikunata mikugka, Taita Diusta: “Pai Siñur” nispa, Iaia Jesusmanda iuiarisa mikuchu. Aicha mana mikugpas, Iaia Jesusmanda iuiarisa mana mikuchu. Paipas, Taita Diusta: “Pai Siñur” nichu.

⁷ Ñi pipas mana kaugsanchichu nukanchimandalla. Chasallata wañuipas, mana nukanchiman-

dalla wañunchichu. ⁸ Kaugsanakunkama, Iaia Jesusmandami kaugsanakunchi. Wañuurapas, Iaia Jesusmandami wañusunchi. Chasapika, kaugsanakuspa wañuurapas, Iaia Jesuspallami kasunchi. ⁹ Iaia Jesucristo, wañuspaka, kikinmi kaugsarirka; chasawaka, wañuskakunata kaugsagkunatapas iaia mandag kangapa.

¹⁰ Nigpika kamka, ¿imapatak Cristowa tukuskakunata nikungi: “Kam, mana allilla ruraspami kangi”? ¿Imapatak paikunata wabutikungi? Tukuikunami iukanchi, Taita Diuspagma chaiagringa. Chipimi allilla u mana allilla ruraskakunata kawachii tukusunchi. ¹¹ Chasallatami ñugpamanda librupi willaraiá:

Atun Taita Diosmi kasa ni:

“Nukapa kaugsaiwami sutipa kasa nini:

Tukuikunami nukapa ñugpa ladu kunguriwangapa kankuna.

Tukuikunami niwangapa kankuna:

‘Kam, tukuimanda mas alli, mas suma, tukuikunapa iaiami kangi.’” ¹² Chasaka, tukuikunami iukanchi, Taita Diospa ñawipi ima ruraskakunata willarigringa.

¹³ Chimandami iukanchi, parijuma mana pitapas ninakunga: “Mana allilla ruraspami kangi”. Chasapaka, kasa iuiarisunchi: Cristowa tukuskakunata mana imapipas pandachispa, pandariipi urmachisunchi. ¹⁴ Iaia Jesusmanda iuiaripa, iachanimi, ñi ima mikui, Diospa ñawipi mapasina mana kagta. Ikuti maikanpas: “Mapami ka” iuiarigpika, chasa iuiarigmanda mapami niraiapunga. ¹⁵ Kam, sug waugki pandarig niraiaska mikuita paipa ñawipi

mikukugpika, mana parijuma kuianakugsinami tukungi. ¡Amalai kam chasa mikukuskata kawaspaka, chi runa Cristowa iuiakuskata sakindra, Cristo paimanda wañugpipas!
¹⁶ Chimanda, kamkuna tukui mikuikunata mikug kagpipas, mana tiachu ñi pipas kawaspa, ningapa: “Chika, mana allilla kanchu”. ¹⁷ Taita Dios ima niskata ruraspa kaugsangapaka mana niraianchu kasa u chasa mikuspa upiaspa kaugsangapa. Santu Ispirituwa alli iuiachiiwa allilla ruraspa, sumaglla kaugsangapami niraiá.
¹⁸ Chasa kaugsaspa, Cristo ima niskata ruragka, Taita Diusta sumagllami kuntintachí. Chasa allilla ruragmandami maikan runapas ninkuna: “Pai, allimi ka”.

¹⁹ Chimanda maskasunchi, imapipas tukuikunawa sumaglla kaugsanakungapa; chasaka tukuikuna, alli suma iuiái iuiachinakuspa kangapa. ²⁰ Kam ima sugkunapa ñawipi mikuskamanda, ¡ujalallapas Taita Dios paikunata suma ruraska kaskata puchukagsina rurakungi! Tukui mikui, mikudirumi niraiá. Chasa niraiagpipas, kam ima mikukuskata sug waugki, kawaspa, nichu mana allilla kagta: chiwanka, sutipami kammanda mana allilla tukunga.
²¹ Cristowa tukuskakuna mana pandaringapa, mas allilla kantra, aicha mana mikungapa, binu mana upiangapa, ñi imapas pandachigsina mana kangapa. ²² Kam ima mikudiru iuiakuskata Taita Diospa ñawillapi iuiakungi. Maikanpas, mikukuspa, paipa iuiaipi mana tiachu imapipas mana allilla ruraska kagta: chi runaka, Taita Diospa iapa kuiaskami ka. ²³ Ikuti maikanpas,

mikukuspa tapurikuchu: “Kai mikui, ¿allilla u mana allillachu ka?”: paika, ña pandarigmi tukú. Ima ruraipipas alli kagta suma iuiaringataka, sug rigcha iuiarisa ruragpika, paika pandariipimi ña urmaska niraiá.

15

Iuiarisunchi, sugkuna allilla kangapa

¹ Nukanchi Cristowa suma iuiarisa kagkunaka iukanchimi, manara paita allilla rigsigkunata, paikuna ima iuianakuskamanda ñi imapas mana ninga. Nukanchi kuntintarisa kangapa mana iuiarisunchi. ² Tukuikunami iukanchi iuiaringa, sugkunapas allilla kangapa; chasaka paikunapas, alli suma iuiái iuiachii tukungapakuna. ³ Cristopas mana iuiakurkachu, kikinlla kuntintarisa kangapa. Nigpika, kasami ñugpamanda librupi paimanda willaraiá: “Kamta kamisa rimaskakunaka, nukatami chaiawarka”. ⁴ Taita Diosmi ñugpamandata tukui iskribichirka, nukanchita iachachingapa. Chi willaraiaskapi nukanchi iachaikuspaka, iukanchimi, sumaglla iuiachirispalla, chi iuiailawa mana sakispalla suiangakuna. ⁵ Taita Diosmi sumaglla nukanchita iuiachimú, mana sakispalla kaugsangapa. Paimi kamkunata iuiachimú, kam kikipura suglla iuiaiwa kaugsanakungapa; imasami Jesucristo kaugsarka: chasallata. ⁶ Chasaka, sugllapi suglla rimagsina, nukanchipa Iaiá Jesucristopa Taita Diusta ningichi: “Kam, iapa suma atunmi kangí”.

*Mana judíu kagkunata, Alli Willaita willaska-
manda*

⁷ Chasamanda, imasami Cristo, kamkunata suma chaskirka: chasallata kam kikipura suma chaskinakuichi; chasawaka, Taita Diusta ninakungapa: “Kam, iapa suma atunmi kangí”.

⁸ Kasapasmi niikichita: Cristo samurkami, judiukunamanda allilla rurag kangapa; chasaka, Taita Dios ima nukanchipa ñugpamanda taitakunata niska tukungapa. Chiwami kawachirka, Taita Dios ima niskata sutipa rurag kagta. ⁹ Mana judíu kagkunamandapasmi Cristo samurka. Paikunamandapasmi Taita Dios llakirirka; chasa iachaspaka, paita: “Kam, iapa suma atunmi kangí” ningapakuna. Chasallatami Cristomanda ñugpamanda librupi willaraiá, Taita Diusta kasa nispa:

Mana judíu kagkunapa chaugpipipas

ningapami kaiki:

“Iapa suma atunmi kangí”.

Kamta suma atuniachispa kantangapami kaiki.

¹⁰ Kasapasmi willaraiá:

Kamkuna mana judíu kagkuna,

Taita Dios agllaska runakunawa alli
kuntintarispa iuiachiriichi. ¹¹ Ikuti

kasapasmi willaraiá:

Tukui kamkuna mana judíu kagkuna,

atun Taita Diusta niichi:

“Kam, iapa suma atunmi kangí”.

Tukui alpapi kaugsagkuna,

chasallata paita nisunchi. ¹² Ikuti Isaiaspas,
kasami willarka:

Isaí suti runapa iawarmandami tiagsamungapa
 ka,
 mana judíu kagkunatapas
 iaia mandag tukugsamungapa.
 Paitami mana judíu kagkunapas suma iuiaiwa
 suiangapa kankuna.

¹³ Taita Dios suma iuiaiwa suiangapa iuiachig,
 paillatata tukui kamkunata iuiachichu, paiwa
 suma iuiaripa, alli iuiachiiwa sumaglla
 kaugsanakungapa; chasaka, Santu Ispiritupa iapa
 iachaiwa paita imapipas suma iuiaiwa suiaspalla
 kaugsangapa.

¹⁴ Nukapa taitakuna i mamakuna, nuka
 kamkunamandami allilla iuiani, tukuipi alli
 kaspá, allilla iachaiwa kagtakuna. Chiwanka
 pudingichimi, kam kikipura sumaglla
 iuiachinakuspa kaugsanakunga. ¹⁵ Nuka chasa
 iuiaspapas, kai kartapi mana manchaspallami
 imakunamanda rimarkaikichita, kamkunata
 iuiachingapa. Taita Dios, iapa kuiawaspa,
 mingawaskamandami chasa rimarkaikichita;
¹⁶ chasaka, Jesucristo ima niwaskata ruraspa,
 mana judíu kagkunata Taita Dios Alli Willaita
 karamuwaskata willangapa. Munakunimi,
 mana judíu kagkunata Taita Diospa ñawipi
 sug kamarikutasina chaskiwangapa; chasaka
 paikuna, Santu Ispirituwa Taita Diospalla
 kangapakuna.

¹⁷ Chimandami, Taita Dios ima munakuskata
 nuka ruraskamanda, Jesucristowa kaspá, iapa alli
 iuiachiiwa kani. ¹⁸ Nuka kikinmandalla ñi imapas
 mana rimarinichu. Cristo kikinmi iuiachiwarka,
 nuka mana judíu kagkunata kaiangapa;

chasaka paikunapas, Cristowa tukungapakuna. Chimandami nuka mana manchaspalla rimani. Rimaikunawa i ruraikunawa,¹⁹ mana imaurapas ruraska ujnachingasina kawachiikunawa, Santu Ispiritupa iapa iachaiwami mana judíu kagkunata kaiangapa iuiachiwarka. Chiwanka, Jerusalenmanda kallarispa, Iliria alpakama, tukuipimi Cristomanda Alli Willaita willaspa purirkani.²⁰ Chasa kagpipas, sugkuna willai kallarikapi, mana; chasapaka munakurkani, Cristopa sutita manara iachariska alpakunapi Alli Willaita willagringapa.²¹ Chasallatami ñugpamanda librupi willaraiá, kasa nispa: Paimanda ñi ima mana iachariska alpakunapimi chi Alli Willaita uiangapa kankuna. Paimanda ñi imaurapas mana uiagkunami iachagsamungapa kankuna.

Romama ringapa, San Pablo iuiakuskamanda

²² Chasa willai purikuspami, kamkunapagma ikuti ikuti chaiagringapa munakuspapas, mana pudirkani.²³ Ikuti kunaauraka, ñami kai alpakunapi puchukarkani willaspa puringapa. Ña achka watamandatami munakurkani, kamkunapagma chaiagringapa.²⁴ Chimandami iuiakuni, España suti alpama rikuspa, kamkunata kawaspa ialigringapa. Kamkunapagma chaiagriura, iapa allimi iuiachiwangapa ka. Kamkunaka, ima ministiskami karawankangichi, nuka Españama chaiagringapa.²⁵ Kunaauraka, Jerusalenmami rikuni, Taita Diuspalla kagkunata mailla kulkiwa aidagringapa.

²⁶ Masedonia i Akaia alpakunapi kaugsaspa Cristowa tukuskakunaka munanakurkami, kulki tandachispa, Jerusalemka kachangapa; chitaka, mana ñi ima iukaska Taita Diuspalla kagkunata karangapa. ²⁷ Paikunapa iuiaillawami chasa aidangapa munarkakuna. Paikunatami chaiarka, chasa aidangapa. Taita Dius judiukunata Alli Willaita karamuskata chi mana judíu kagkuna chaskiskamandaka, iukankunami judiukunata ima ministiskakunata aidangakuna. ²⁸ Chimanda, chi tandachiska kulkita Jerusalemka kaugsanakuskata nuka karagringapa puchukauraka, Españama rikuspa, kamkunapagpi iaikuspami ialigrisa. ²⁹ Kasami iachani: kamkunapagma nuka chaiagriura, Cristomi nukanchita mas suma kuiangapa ka.

³⁰ Taitakuna i mamakuna, nukanchipa Iaia Jesucristomanda i Santu Ispíritu karamuska kuiaimandami mañaikichita: nukamanda Taita Diusta suma mañaspa aidawaichi.

³¹ Mañapuaichi, Judea alpapi kaugsaspa Cristota mana uiagkunamanda Taita Dius michawachu. Chasallata mañapuaichi, Taita Diuspalla kagkunaka, Jerusalemka nuka apakuska kulkita sumaglla mana piñarispalla chaskiwachukuna. ³² Chiwanka, Taita Dius munagpika, kamkunapagma alli iuiachiiwa chaiagrispa, kamkunawa allilla samarigringapa mañapuaichi. ³³ Taita Dius sumaglla kaugsaita karag, tukui kamkunawa kapuachu. Chasa kachu.

*San Pablo rigsiskakunata: “Puangi”
niskamanda*

¹ Nukanchipa mama pani Febeta allilla chaskipuaichi. Paika, Senkrea puiblupi Cristowa tukuskakunata aidagmi ka. ² Imasami chaiá, Taita Diuspalla kagkunata chaskingapa: chasallata paitapas chaskipuaichi, Iaia Jesusta iuiaripa. Chi panika, achkakunata i nukatapas aidagmi ka. Allilla ruraskamanda, paita ima ministiskata karapuaichi.

³ Pani Priskata i paipa kusa Akilata: “Puangi” nipuaichi. Paikunapas, nukawa Jesucristomanda Alli Willaita willagkunami kankuna. ⁴ Paikuna, nukamanda asllamandallami kispirkakuna wañungapa. Chimanda paikunata, nukalla mana “Pai Siñur” ninichu. Tukui mana judiukuna, Cristowa tukuspa, maipi kagkunapasmi, “Pai Siñur” ninakú. ⁵ Priska i Akilapa wasipi Cristowa tukuskakuna sugllapi tandariskakunatapas: “Puangi” nipuaichi.

Nukapa kuiaska waugki Epenetotapas: “Puangi” nipuaichi. Paika, Asia alpapi tukuikunamanda ñugpa Cristowa tukuskami ka.

⁶ Pani Mariatapas: “Puangi” nipuaichi. Paika, kamkunapuramanda achka allillami rurarka.

⁷ Nukapa alpamanda nukawa wichkaraiaskapi kaska waugki Andronikota i Juniastapas: “Puangi” nipuaichi. Paikunamandaka, Jesús kikin kachaska runakunami ninkuna: “Iapa allimi kankuna”. Nukamanda mas ñugpami Cristowa tukuska kankuna.

⁸ Iaia Jesuswa suma iuiarig kagmanda, nukapa kuiaska waugki Ampliatotapas:

“Puangi” nipuaichi. ⁹ Waugki Urbano, nukanchiwa Cristomanda Ali Willaita willagtapas: “Puangi” nipuaichi. Nukapa kuiaska waugki Estakistapas: “Puangi” nipuaichi. ¹⁰ Waugki Apeles, Cristowa suma iuiarig kagta kawachirigtapas: “Puangi” nipuaichi. Waugki Aristobulopa wasipi kaugsanakuskatapas: “Puangi” nipuaichi. ¹¹ Nukapa alpamanda kaska waugki Erodiontapas: “Puangi” nipuaichi. Waugki Narsisopa wasipi Iaia Jesuswa suma iuiarigkunatapas: “Puangi” nipuaichi. ¹² Pani Trifenata i pani Trifosatapas: “Puangi” nipuaichi. Paikunapas, Iaia Jesusmanda allilla ruragkunami kankuna. Nukapa kuiaska pani Persidatapas: “Puangi” nipuaichi. Paika, Iaia Jesusmanda iapa sinchi ruragmi ka. ¹³ Iaia Jesús agllaska waugki Rufota i paipa mamatapas: “Puangi” nipuaichi. Paipa mamaka, nukapa mamasinami kapuá. ¹⁴ Waugki Asinkritota, waugki Flegonteta, waugki Ermesta, waugki Patrobasta, waugki Ermesta i tukui paikunawa waugkikunatapas: “Puangi” nipuaichi. ¹⁵ Waugki Filologota i pani Juliata, waugki Nereota i paipa panita, waugki Olimpasta i tukui paikunawa Taita Diuspalla kagkunatapas: “Puangi” nipuaichi.

¹⁶ Kam kikinpura Taita Diosmanda iuiarispas, “Puangi” muchanakuspa ninakuichi. Cristowa tukuskakuna maipi kagkunapas, tukuikunami kamkunata: “Puangi” ninakú.

¹⁷ Kam taita i mamakunata mañaikichitami: maikankunapas Cristowa tukuskakunata iskaima tukungapa piñachirinakuspa pandachigkuna kaskata kawapuaichi. Chasa pandachigkunaka,

kamkuna Alli Willaita iachaikuskata tunti-achigsinami ruranakú. Paikuna kaskamanda anchuriichi. ¹⁸ Chasa ruragkunaka, nukanchipa Iaia Cristo imasa munakuskasina mana ruranakunchu. Pai kikinkuna iuiarispamunaskakunallatami ruranakú. Paikunapa miski simiwa, suma rimaiwami maikan manara allilla iachagkunapa iuiaita tuntiachinakú.

¹⁹ Kamkunaka Cristo ima niskata ruragkuna kagta, tukuikunami iachanchi. Chimandami kamkunamanda, nuka iapa alli kuntintulla kani. Kamkuna chasa kagpipas, munanimi, kamkuna iachakunasina mas suma ruraikunata agllaspa kangapa. Ikuti jiru rurangapaka, mana iachagsina kaichi. ²⁰ Taita Dios, kamkunata sumaglla kaugsaita karag, mana unailami iaia kukuta kamkunapa chaki sarudiru ukuma pambangapa ka. Nukanchipa Iaia Jesús, kamkunata sumaglla kawapuachu.

²¹ Waugki Timoteo, nukawa Alli Willaita willagmi kamkunata: “Puangi” niku. Nukapa alpamanda kaska waugkikuna Lusio, Jasón i Sosipaterpasmi, “Puangi” ninakú.

²² Nuka kikin Tersio, kai kartata Pablomanda iskribig, Iaia Jesusta iuiarispami, “Puangi” niiki-chita.

²³ Waugki Gaiomi kamkunata: “Puangi” niku. Paipa wasipimi nuka Pablo kaugsakuni. Tukui Cristowa tukuskakunapasmi kaipi tandarinkuna. Waugki Erasto kai puiblupi kulki wakachigpasmi, “Puangi” niku. Waugki Kuartopasmi “Puangi” niku.

²⁴ [Nukanchipa Iaia Jesús, tukui kamkunata sumaglla kawapuachu. Chasa kachu.]

Taita Diusta iapa suma atun kagta nispa, puchukariskamanda

²⁵ Taita Diusta nisunchi, iapa suma atun kagta. Paimi pudí, kamkunata tukuipi allilla charingapa. Chasallatami nuka, Jesucristomanda Alli Willaita iachachispa willani. Chi Willaita, kai alpa manara tiagsamuskauramandata, mana pipas iachaska kaskatami. ²⁶ Taita Dios, pailla iachaskata kuna naura willangapa kachamurka. Ñugpamandata Santu Ispirituwa rimagkuna iskribiraiaskapipas, chi Willaita willaskami tiarka. Taita Dios kikin mana wañugmi chasa willangapa kachamurka; tukui kai alpapi kaugsagkunaka, chi Willaita iachaspa, suma iuiarispas, Taita Dios ima niskata ruraspa kaugsangapa.

²⁷ Taita Dios suglla tukui iachagta Jesucristowa nisunchi: “Kam, iapa suma atunmi kangi, maituku waranga waranga watakuna ialigpipas”. Chasa kachu.

Kaipimi Taita Dius Rimaku New Testament in Inga

copyright © 2009 Wycliffe Bible Translators, Inc.

Language: Inga

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Inga

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 21 Feb 2024 from source files
dated 29 Jan 2022
7cb53c42-7354-5f68-b71b-5115a92bd97a